

元史



元史類編卷之三十五

南沙席世臣郢客氏稜利

文翰一

楊奐 楊果 牟應龍 鄭滁孫 危復之附何中 陸文圭

附梁益 姚燧 趙孟頫 陳孚附馮子振 韓性 鄧文原 戴表

元 李之紹 貫雲石 海涯 楊載附楊剛中 元明善 虞集

弟槃 范梈 揭傒斯 周仁榮附孟慶恂 宇文公諒 李河

曹鑑 黃潛 柳貫 吳萊 歐陽元 陳旅附程文陳纘曾 劉詵

附龍仁夫 劉岳申 李孝光 孫轍附吳廻翁 杜本 張樞 蘇天爵 貢

師泰 周伯琦 張翥 朱震亨 李杲

楊奐字煥然乾州奉天人生之夕母寢東南日光射其身旁一神

人授之以筆其父謂文明之象因名曰奐金末舉進士不申歸而

設教鄉里

元好問墓碑云年十一丁內艱日蔬食誦孝經為課人以天至稱又五年師鄉先生吳榮叔未幾賦業成即有聲場屋興定辛巳下第同舍生勸試補臺掾與答書曰先大人每以作掾為諱僕無所似肖不能顯親揚名敢貽泉下之憂乎

一統志云元初隱居鄆縣講道授徒學者稱為紫陽先生

金汴京降與微服北

渡冠氏帥趙壽之延致待以師禮門人有自京師載書來者因得

聚讀東平嚴實聞免名數問其行藏與終不一詣太宗詔宣德稅

課使劉用之試諸道進士免試東平兩中賦論第一從監試官北

上以中書令耶律楚材薦授河南路徵收課稅所長官兼廉訪使

魚白著還山集云歲已酉中書耶律公以軍國大計舉近世轉運司例經理十路課稅易司為所黜使稱長相豐歉察息耗以平歲入聽中書省總之開創伊始制度未遑天下郡縣猶以財賦自贍不重其權則無以剗其弊故吏汚濫得廉糾刑賦舛錯得釐正之凡在吏許自辟以從將行言於楚材曰僕不敏誤蒙不次

之用以書生理財賦已非所長况河南兵荒後遺民無幾烹鮮之

喻正在今日急而擾之糜爛必矣願假以歲月使得撫摩瘡痍為

朝廷愛養基本楚材甚善之既至一以簡易為政按行境內親問

監務月課幾何有以增額進者遽責之曰剝下欺上汝欲我為之

邢減元額四之一公私稱便在官十年乃請老于燕之行臺世祖

在潛邸驛召奐參議京兆宣撫司事碑云累上書乃得請閑居鄉郡築室曰歸來為佚老之所年七十疾

疾篤處置後事如平時引觴大笑而卒碑云敕家人吾且死勿以二氏齋醮貽識者笑賜諡文憲

與博覽強記作文務去陳言以蹈襲古人為耻朝廷諸老皆折行

輩與交關中號多士名未有出奐右者所著有還山集六十卷大

興近鑑三卷正統書六十卷行世

楊果字正卿邠州蒲陰人宋末徙許昌以章句授徒為業流寓軾

軻十餘載登金正大中進士參政李蹊行大司農于許昌果以詩

送之蹊大稱賞歸言於朝用為偃師令俄調蒲城及陝皆劇縣所

到以廉幹稱金亡果閒廢久會楊奐徵河南課稅辟為經歷未幾

史天澤經畧河南復用為參議時兵革之餘法度草創果隨宜贊

畫民賴以安世祖中統元年命為北京宣撫使明年拜參知政事

與左丞姚樞等日赴省議事尋出為懷孟路總管以老致政卒于家年七十五諡文獻果性明敏美丰姿工文章尤長於樂府善諧謔聞者絕倒有西庵集行世

牟應龍字伯成其先蜀人後徙吳興祖子才仕宋為國學博士諡

清忠

虞集墓碑云子才以言事忤時宰鄭清之去國抵吳興寓第而應龍生子才喜字曰翁歸

父獻為大理少卿

應龍作王應麟小學紺珠序自云大

父第故宋嘉定癸丑進士父數典銓曹

應龍幼警敏為文有渾厚氣當以任子補京職盡讓

諸從弟而自業舉子成咸淳初進士時賈似道當國欲邀一見處以高第應龍拒不往及廷對極言上下情隔國勢危急狀考官不敢寘上第除光州定城尉應龍曰昔吾祖對策以直言忤史彌遠得洪雅尉今固當爾無媿也沿海制置司辟為屬以疾辭宋亡故相留夢炎位冢宰以書招之曰苟至翰林可得也亦不答已而起家教授溧陽州晚以上元縣主簿致仕初宋亡時獻已退不仕一

門父子自爲師友討論經學於諸經皆有成說惟五經音攷盛行於世應龍爲文長於敘事時求其文者車轍滿門人擬之眉山父子學者稱曰隆山先生

鄭滁孫字景歐處州人宋景定間進士爲禮部郎官至元三十年有以滁孫名薦者世祖召見授集賢直學士尋遷侍講學士卽致仕歸第陶孫字景潛亦宋進士監西嶽祠先滁孫徵至闕奏對稱旨授國史院編修官纂修宋史至德祐末年事陶孫曰臣嘗仕宋宋是年亡義不忍書世祖嘉之轉應奉翰林文字兄弟在當時最號博洽學士大夫翕然推重隆福宮以其兄弟皆前朝士特製衣親賜之人以爲異遇滁孫所著有大易法象通贊周易記玩等書陶孫有文集若干卷

危復之字見心江西撫州人宋末爲太學生師事湯漢博覽羣書

好讀易尤工於詩世祖至元初元帥郭昂屢薦為本路儒學官不就後朝廷累遣奉御察罕及翰林應奉詹玉以幣徵之皆弗起終隱紫霞山中學者私謚貞白先生

同郡何中字太虛一統志云宋末舉進士少穎拔以古學自任家有藏書萬卷手自校讎日與門弟子講經義其學宏深該博江西行省全岳桂聘為宗濂書院山長所著有易類象書傳補遺通鑑綱目測海及知非堂稿支頤錄諸書何中自序稟尚有通

書問叶韻補疑六書綱領各一卷

陸文圭字子芳江陰人幼穎悟博通經史百家宋咸淳初以春秋中鄉選年甫十八宋亡隱居城東學者稱曰墻東先生延祐設科有司強之就試凡一再中鄉舉為文融串經傳縱橫變化莫測其涯際東南學者宗之朝廷數遣使馳聘以老疾不行卒年八十五性高邁以奇氣自負於地理考覈尤詳凡天下郡縣沿革人物土

產悉能默記如指掌先屬纊一日語門人曰以數考之吾州二十
年後必被兵吾死當葬不食之地勿封勿樹使人不知吾墓所在
庶無暴骨患其後江陰亂冢盡發人服其先知著墻東類橐二十
卷 同里梁益字友直博洽經史工文辭其教人以變化氣質爲
先學徒不遠千里從之自文圭旣卒浙西稱學術醇正者惟益而
已所著有三山橐詩緒餘史傳姓氏纂又有詩傳旁通等書深得
朱子之學

姚燧字端甫平州柳城人左丞樞之從子也生三歲而孤樞育之
方隱居蘇門山謂燧蒙闇教督之過急燧不能堪楊奐上之曰燧
令器也長自有成何急爲且許黜以女年十三見許衡於蘇門十
八始受學時未嘗爲文視流輩所作惟見其不如古人心弗是也
二十四始讀韓退之文試習之人謂有作者氣世祖至元七年衡

為祭酒奏召舊弟子燧自太原驛致館下初為秦王府文學未幾

兼提舉陝西學校以秦王命安輯庸蜀凡三使蜀皆稱職再遷翰

林直學士改大司農丞成宗元貞初總裁世祖實錄書成授江東

道廉訪使

理學宗傳作江西行省參政

移病寓太平仁宗居藩邸開宮師府燧年已

七十遣正字呂洙如漢徵四皓故事起為太子賓客尋拜太子少

傅辭曰昔臣伯父樞嘗除是官尚不敢拜臣何敢受改翰林學士

承旨逾年得告南歸卒年七十六諡曰文初燧居蘇門時讀通鑑

綱目嘗病國統散於逐年不能一覽得離合之槩及告病江東著

國統離合表年經國緯如史記諸表將附朱熹凡例後復取徽建

二本校讐得三誤焉序於表首為文閎肆該洽豪而不宕剛而不

厲舂容盛大有西漢風當時有欲闡揚先德者必求燧文多以不

得為媿每來謁文必其行業可嘉然後許辭無溢美又稍廣置燕

樂則爲之喜而援筆疾書否則弗易得也書史會要云燧以文高麗藩

陽王父子連姻帝室領貴結朝臣一日欲求燧詩文靳不與至奉

旨乃與之王致謝幣帛金玉五十筐燧即分散諸官屬及史胥侍

從以金銀付翰林院爲公用器或問之燧曰彼藩邦小國唯以貨

利爲重吾能輕之使知大朝不以是爲意燧頗恃才輕睨趙孟頫

元明善輩所著有牧庵文集五十卷輟耕錄云燧在中臺時忽御史大夫謂曰

輿利除害事未有片言相及惟以舉薦爲務何耶燧曰某所薦百有餘人皆經世才其在中外並

能上祿聖治則某之報效亦勤矣何屑屑與利除害爲按本傳不言燧爲中臺御史亦不詳薦舉

事又云燧爲翰林學士承旨日玉堂設宴歌妓羅列中有一人秀麗閑雅微操閩音燧問其履

歷初不以實對叩之再泣曰妾乃建寧人氏父官朔方祿薄不足以給侵貸公帑無償遂流落至

此燧命之坐遣使詣丞相三寶奴請爲落籍丞相素敬燧意燧欲之即令教坊除

籍燧得報語一小史曰我以此女爲汝妻女即以我爲父史忻然京師傳爲盛事

冊曰華文敷實諛墓寧譏名聞外裔不爲利移才行兼美實

爲世師方之謝氏邇末同歸

趙孟頫字子昂書史會要云宋秦王德芳之後五世祖秀王子稱實生

孝宗賜第湖州故孟頫為湖州人幼聰敏為文操筆立就

名賢錄云成進士為

潤州錄事參軍元詩選云年十四以父廢補官

宋亡絕意仕進益自力學至元二十四年侍御史

程鉅夫奉詔搜訪遺逸以孟頫入見神采煥發世祖顧之喜命坐

右丞葉李上或言宋宗室子不宜使近左右帝不聽時方立尚書

省命孟頫草詔帝覽之喜曰得朕心所欲言矣會更造至元寶鈔

帝令與議刑曹欲計贓罪滿至元鈔二百貫者死孟頫曰始造中

統鈔時以銀為本虛實相權及今二十餘年輕重相去不啻數十

倍故改中統為至元若謂至元鈔終無虛時寧有是理計鈔抵法

疑太重古者以米絹民生所須謂之二實銀錢與二物相權謂之

二虛四者為直雖升降有時終不大相懸也以絹計贓為適中或

以孟頫年少且初自南來輒妄議國法意頗不平孟頫曰法者人

命所繫議有重輕則人不得其死矣孟頫奉詔與議不敢不言也

是年六月授兵部郎中時至元鈔法果滯澁不行遣尚書劉宣與
孟頫馳驛至江南問行省丞相慢令罪詔凡左右司及諸路官則
徑加咎責孟頫受命往比還不答一人大忤丞相桑哥意有王虎
臣者訴平江路總管趙全不法卽命虎臣往按其事葉李執奏不
聽孟頫進曰前虎臣守郡時多強買人田全數與爭今往必將陷
之縱得實人亦不能無疑帝悟乃遣他使桑哥當鐘初鳴時卽坐
省中六曹官後至者咎之不少貸一日孟頫後至斷事官遽引受
咎孟頫入訴於都堂右丞葉李曰古者刑不上大夫所以養其廉
耻教之節義且辱士大夫是辱朝廷也桑哥亟慰之使出續資治云
孟頫行東

御膳外道陰馬跌墜于河市聞之賜鈔五十錠可移築御墻稍西二丈許

二十七年遷集賢直學士八月地震武平

路尤甚地陷黑沙水湧出時帝駐蹕龍虎臺遣平章阿魯渾薩理
馳還召集賢翰林兩院官詢致災之由議者但泛引五行災異言

以修人事應天變爲對莫敢語及時政先是桑哥遣其黨理算天下錢穀已徵者數百萬未徵者尚數千萬民不聊生自殺者相屬孟頫素與阿魯渾薩理善勸入奏於帝請下詔蠲除庶天變可挽帝從之詔已具桑哥怒曰此必非帝意孟頫曰凡錢糧未徵者其人死亡已盡復何所從取不及時除免他日言事者倘以失陷錢糧數千萬歸咎尚書省豈不爲丞相累邪桑哥悅遂下詔民始獲蘇帝嘗問葉李留夢炎優劣對曰夢炎臣父執素重厚篤於自信好謀而能斷有大臣器葉李所讀之書臣皆讀之其所知所能臣皆知之能之帝曰汝以夢炎賢於李邪夢炎在宋爲狀元位丞相當賈似道誤國罔上夢炎依阿取容李布衣乃伏闕上書力詆似道其賢於夢炎甚遠汝以夢炎爲父友不敢直斥其非可作詩以譏之孟頫賦詩有往事已非那可說且將忠直報皇元之語帝益

嘆賞孟頫退謂奉御徹里曰止論賈似道誤國責留夢炎不言今

桑哥罪甚於似道而我輩不言他日何以辭其責侍臣中慷慨有

大節又為上所親信無踰公者夫捐一旦之命為萬姓除殘仁者

事也公其勉之既而徹里果於帝前首發桑哥罪惡會大臣亦有

繼言者帝遂按誅桑哥歐陽元神道碑云後徹里語及所事嘆曰使我有萬世名者子昂之力也孟頫自念久在上

測必為人所忌力請補外出同知濟南路總管府事及修世祖實

錄名還命書金字藏經既成除集賢直學士仁宗在東宮知其名

比即位名為集賢侍講學士河間志云皇慶元年九月河間進嘉禾異畝同頫有一穗數莖者命孟頫繪圖藏諸秘府延祐三

年拜翰林學士承旨帝嘗與侍臣論文學之士以孟頫比唐李白

宋蘇軾焉又嘗稱其狀貌昉麗操履純正博學多聞文詞高古書

畫絕倫旁通佛老之旨皆人所不及有問之者言國史不宜使孟

頫典其事帝曰趙子昂世祖所簡拔朕特優以禮貌置之館閣令

典司述作俾可傳後世此屬嗷嗷何也俄賜鈔五百錠謂侍臣曰
 中書每稱國用不足必持不與其以普慶寺別貯鈔給之孟頫嘗
 累月不至宮中帝以問左右皆謂其年老畏寒勅御府賜貂裘一
 襲初孟頫以程鉅夫薦起家為郎及鉅夫以翰林學士致仕去孟
 頫代之先往拜其門而後入院尋得請南歸至治元年英宗遣使
 即其家令書孝經明年六月卒追封魏國公諡文敏所著松雪齋
 集詩文清邃奇逸篆籀分隸真行草書無不冠絕今古有天竺僧
 數萬里來求其書歸國中寶之其畫山水木石花竹人馬尤精八
 神品史官楊載稱孟頫才頗為書畫所掩知其書畫者不知其文
 章知其文章者不知其經濟人以為知言輟耕錄云孟頫書法人但知自魏
晉中來晚年則稍入李北海耳嘗
見千字文一卷以為唐人字絕無一點一畫似孟頫法度閱至後方知為孟頫書其自題云僕廿
年來寫千文以百數此卷殆數年前所書當時學褚河南孟法師碑故結字規模八分今日視之
不知孰為勝也田君良卿于市中買得此卷特來求跋為書其後因思自五歲入小學學書不過
知世人漫學之耳不意時人持去可以粥錢而良卿又捐錢以購之皆可笑也又聞孟頫偶得米

海岳書壯懷賦中闕數行因取刻本摹搨以補其闕凡易

子雍奕並以書畫知名

五七紙終不如意乃嘆曰今不逮古多矣遂以刻本完之

書史會要云雍字仲穆官集賢待制工真行草篆篆法二李而清勁有餘真行草皆得父傳孟頫常為幻住庵僧寫金剛經未及半而卒雍足成之其聯續處人莫能辨奕字仲光隱居不任工真行草書其合作者可與孟頫亂真

圖補妻管氏名道昇字仲姬吳興人善繪寶鑑云雍畫山水師董源尤善人馬

詞章作墨竹筆意清絕亦能書仁宗嘗取其書合孟頫及雍書裝

潢成帙識以御寶命藏秘書監曰使後世知我朝有一家夫婦父

子皆善書者 兄孟頫字山齋書法宗二王 弟孟頴字子俊官

知州工人物花鳥亦善書 孫鳳字允文麟字彥徵皆雍子亦以

能書名 俱見書史 會要補

冊曰文為藝掩經猷誰識持正拒邪有裨邦國惜以楚材乃

為晉用憂炎之論得無餘痛

陳孚字剛中台州臨海人至元中以布衣上大統賦江浙行省

聞於朝署上蔡書院山長考滿謁選京師世祖命尚書梁會使安

南選南士為介朝臣薦孚博雅有氣節授翰林院編修官為曾副

至安南世子陳日燭以憂制不郊迎又不令由中門入曾致書詰

責往復再三辭直氣壯皆孚筆也詳見梁曾傳使還除翰林待制帝方欲

實之要地而廷臣以孚南人且尚氣頗嫉之調建德路治中秩滿

復請典鄉郡授台州路治中成宗大德七年奉使宣撫循行諸道

時台州饑道殣相望浙東元帥脫歡察兒怙勢立威孚愬其不法

蠹民事宜撫使按實坐其罪亟命發倉賑救民賴全活者眾而孚

亦以此致疾卒于家府志云贈臨海郡公諡文惠有人游觀光玉堂交州桐江柯山等稿孚天材過人性任俠

不羈為詩文任意即成不事雕斲有文集行世輟耕錄云孚國初時嘗為僧以避世變一日大書所

作詩於其父執某之粉牆上云我不學寇丞相地黃變髮髮如漆又不學張長史醉後揮毫掃狂

墨平生紺髮三千丈幾度和雲眠石上不合感時怒衝冠天文罰作圓頂相肺肝本無兒女情亦

豈惜此雙鬢青只憶山間秋月令搔首不見鬢鬆影父執見之曰此子欲歸俗也呼來館穀之命

養髮經半年餘謂曰吾將以女事汝孚辭謝既而命為他所遣媒妁行言擇日迎歸父執喜曰五

馬八門英字還學家 攸州馮子振豪俊與孚畧同孚敬畏之自謂不可

東京館閣文章薦舉

及嘗爲詩譽桑哥且涉大言及敗卽告詞臣撰碑引喻失當陳孚發其姦狀帝曰詞臣何罪使以譽桑哥爲罪則在廷誰不譽之卽朕亦嘗譽之矣子振於書無所不記當爲文酒酣耳熱命侍史二三人濡筆以俟據案疾書隨紙數多寡頃刻輒盡雖美如簇錦而律之法度或乖人以此少之

韓性字明善紹興人其先家安陽高祖左司郎中膺胄扈從南渡因家于越性天資警敏九歲通小戴禮作大義操筆立就及長博綜羣籍自經史至諸子百家莫不究其根柢而於先儒性理之說尤深爲文博達雋偉變化不測自成一家言四方人士受業其門戶外之履嘗滿延祐初仁宗設科取士學者多以文格爲請性曰今之貢舉悉本朱熹私議爲貢舉之文不知朱氏之學可乎四書六經千載不傳之學自程朱二氏發明無餘蘊矣願力行何如耳

有德者必有言施之場屋直其末事豈有他格哉凡經其口授指畫不爲甚高論而義理自勝不期文之工而不能不工以應有司之求未有不合繩尺者士有一善必爲之延譽不已及辨析是非則毅然有不可犯之色出無輿馬僕御所過負者息肩行者避道巷夫街叟下至童穉厮役咸稱之曰韓先生憲府嘗舉爲教官謝曰讀書砥行無愧古人足矣祿仕非所願也暮年愈自韜晦然未嘗忘情斯世郡守於政事有所咨訪輒從容陳利弊得失不稍遜門人李齊爲南臺御史力舉其行誼而性已卒賜諡莊節先生著禮記說四卷詩音釋書辨疑各一卷郡志八卷文集十二卷

鄧文原字匪石四川綿州人後徙錢塘年十五通春秋宋末以流寓試浙西轉運司魁四川士世祖至元中辟爲杭州路儒學正成宗大德五年擢應奉翰林文字預修實錄尋授江浙儒學提舉仁

宗卽位召爲國子司業科舉制行文原校文江荆慮士守舊習大
書朱熹貢舉私議揭於門延祐四年遷翰林待制踰年出僉浙西
道廉訪司事吳興民夜行爲邏者所執繫亭下其人遁去有追及
之者刺其脇仆地明旦家人得之歸比死問刺汝者何如人曰青
衣長身者家人愬於官問直初更者曰張福兒執之使誣服械繫
三年文原錄之曰福身不滿六尺未見其長刃傷右脇而福素用
左手傷宜在左鞫之果得真殺人者尋移江東道先是徽寧廣德
三郡歲入茶課鈔三千錠後立減引增課法遂以十八萬錠爲額
竭山谷所產不能充其半有司皆派取民間時權茶轉運司得專
制凡五品以下官並聽杖決州縣莫敢誰何文原請罷其專司俾
郡縣兼領不報英宗至治初召爲集賢直學士會地震詔議弭災
法文原復申前議請罷權茶專司又不報明年兼國子祭酒以疾

致仕歸屢名不赴卒年七十一贈江瀚行省參政諡文肅文原內

嚴而外恕家貧而行廉初客京師有一書生病篤取橐中金屬文

原歸遺其親既死而同舍生竊金去文原買金償死者家終身不

以語人有文集若干卷內制集若干卷藏于家書史會要云文原嘗自題其居曰素履人遂稱素履

先主為文精深典雅詩簡古而麗正行草書早法二王後法李北海虞集云大德延祐間漁陽吳興巴西翰墨擅一代

戴表元字帥初慶元奉化州人七歲學古詩文多奇語稍長從里

師習詞賦輒棄不肯為登咸淳中乙科一統志云為建寧教授閔宋末文氣萎蕭

而辭骯骯慨然以起衰為已任時四明王應麟天台舒岳祥並以

文名海內表元皆從而受業故其學博而肆其文清深雅潔蓄而

始發間事摹畫而隅角不露東南文章大家必推首焉元詩選云性好山水每策杖遊

眺望倦輒止或自稱質野翁又號充安老人成宗大德八年除信州教授再調婺州時年六十

餘矣以疾辭其後翰林集賢復以修撰博士交薦不起有剡源集

行世

李之紹字伯宗東平平陰人幼從李謙學家貧教授鄉里學者咸
集會修世祖實錄以薦授國史院編修官姚燧欲試其才凡館閣
應酬文積十餘事併以屬之紹援筆立成燧驚喜曰可謂名下無
虛矣聞母疾辭歸成宗大德六年除應奉翰林文字遷太常博士
仁宗皇慶初由國子司業遷祭酒夙夜孳孳惟以教育人材爲念
六年改翰林直學士復以疾還英宗至治初起爲翰林侍講學士
踰年告歸卒年七十三紹性遇事少斷故號果齋以自勗有文集

藏于家

貫雲石海涯功臣阿里海牙孫也父名貫只哥因以貫爲氏自號
酸齋母廉氏夜夢神人授以大星吞之已而有娠及生神彩秀異
年十二三英爽有膂力使健兒驅三惡馬疾馳已持槊立待馬至

騰上之越二而跨三運槩生風觀者辟易稍長折節讀書吐辭不
蹈襲故常初襲父官爲兩淮萬戶鎮永州御軍嚴肅稍暇輒歌雅
投壺意所暢適不爲形跡拘一日呼弟忽都海涯語曰吾平生宦
情最薄顧祖父之爵不敢不襲今已數年矣願以讓弟語訖卽解
所緝金虎符佩之北從姚燧學燧見其古文峭厲有法及歌行古
樂府慷慨激烈大奇之仁宗在東宮聞其以爵讓弟謂宮臣曰將
相家子弟有如是賢者邪選爲說書秀才宿衛禁中仁宗踐祚上
疏條六事曰釋邊戍以修文德教太子以正國本設諫官以輔聖
德表姓氏以旌勲胄定服色以變風俗舉賢才以恢至道書凡萬
餘言未報拜翰林侍讀學士忽喟然嘆曰辭尊居卑昔賢所尚今
禁林清選與所讓軍資孰高人將議吾後矣遂稱疾還江南賣藥
錢塘市詭姓名易服色人無有識之者偶過梁山灤見漁父織蘆

花爲被欲易之以紬漁父疑其人陽曰君欲吾被當爲賦詩遂接
筆立成竟持被去人間喧傳蘆花被詩晚年文日遠詩益冲澹草
隸書稍取古人所長變化自成一家其視死生若晝夜絕不凝滯
於物翛然欲遺世而獨立歐陽元神道碑云常八天目山見中峯禪師刻談大道每夏坐禪包山暑退始入城卒封京兆
郡公諡文靖有詩文若干卷直解孝經一卷

開曰上馬橫梁下馬賦詩將相之裔無負堂基既讓厥蔭朝
除復辭翛然遺世物外高資

楊載字仲宏福建浦城人少孤博涉羣書年四十不仕戶部貢國
英數薦於朝以布衣召入爲國史院編修官預修武宗實錄延祐
初仁宗以科日取士載首應詔登進士第歷仕寧國路推官初趙
孟頫在翰林得載所爲文極加推重由是名動京師其文章一以
氣爲主博而敏直而不肆尤以詩名家嘗語學者曰詩當取材漢

魏而音節則以唐為宗自其詩出一洗宋季之陋元詩選有仲宏集載詩甚富楊

剛中字志行上元人為文奇奧簡澁動法古人不屑為世俗凡近

語元明善極嘆異之官翰林待制有霜月集行世其甥李桓字晉

仲出鄉貢士官江淞儒學副提舉亦以文鳴江東載與剛中同輩

行而桓稍後

元明善字復初大名清河人其先蓋拓跋魏之裔居清河者四世

明善穎悟絕出讀諸經皆有法而尤深於春秋弱冠游吳中已名

能文章浙東使者薦為安豐建康兩學正辟掾行樞密院時董士

選僉院事待之若賓友士選任江西左丞又辟為省掾虔州劉貴

反擒賊三百人明善議寬誥誤得全活者百三十人既又得賊所

書贖吉民丁十萬於籍者有司欲滋蔓為利明善請火其籍以滅

跡二郡遂安歷轉中書左曹掾先是在江西時張瑄為參政假明

善馬爲從騎愛之致米三十斛酬其直後瑄敗籍其家得金穀簿
止書致米不言酬直故明善坐是免久之有白其事者乃復掾省
曹仁宗居東宮首擢爲太子文學及卽位授翰林待制預修成宗
實錄遷翰林直學士詔節尚書經文譯其關政要者以進明善每
奏一篇帝必稱善曰二帝三王之道非卿莫聞也延祐初轉禮部
尚書歷拜翰林學士英宗親裸太室禮官進祝冊請署御名命明
善代署者三眷遇莫比卒封清河郡公諡文敏

輟耕錄云明善參議中書日曾朝廷遣蒙古大臣使

交趾明善副之將還國主賚以金蒙古受之明善固辭國主曰彼使臣已受矣公獨何爲明善曰彼所以受者安小國之心我所以不受者全大國之體國主嘆服

明善早以

文章自豪出入秦漢間晚益精進在江西金陵每與虞集劇論以
相劇切明善言集治諸經惟朱子所定者耳自漢以來先儒所嘗
盡心者考之殊未博集則言凡爲文辭得所欲言而止必如明善
云若雷霆之震驚鬼神之靈變然後可稱於世非性情之正也

人初相得甚驩至京師寢不相下會士選自中臺行省江浙二人俱送出都門士選曰伯生以教導爲職當早還復初官有餘閒宜更送我集還明善送至一舍許士選下馬入邸舍舉酒相屬曰僕以功臣子出入臺省無補國家惟求得佳士數人爲朝廷用如復初與伯生他日必皆貴顯然恐不免爲人構間復初中原人也仕必當道伯生南士將爲復初摧折今爲我飲此酒慎勿如是明善受卮酒跪而酌之起曰誠如公言無論他日今隙已開矣請再賜一卮明善終身不敢忘公言乃更飲滿而別真人吳全節與明善交最密嘗求作碑文旣成明善謂全節曰伯生每見吾文必有譏彈乃吾所願聞若爲我治具招來觀之如已入石則無及矣明日集至明善出其文問何如曰公能從集言去百有餘字則可傳矣明善卽泚筆屬集凡刪去百二十字而文益精當明善大服遂驩

好如初

冊曰文人相傾自古有然洛蜀之釁由此基焉伯生正士小忿宜捐董公爲國友道以全恩不求知千古猶賢

虞集字伯生蜀郡人宋丞相允文五世孫父汲爲黃岡尉宋亡僑居臨川嘗起家長沙教授避亂趨嶺表干戈中無書可攜集母楊氏祭酒楊文仲女也口授集論語孟子左氏傳歐蘇文過耳輒成誦比還長沙就外傳始得刻本則已盡讀諸經通大義文仲世以春秋名家楊氏在室卽通其義故集與弟槃皆受業家庭具有源委左丞董士選除南臺中丞延集主家塾成宗大德初以薦授京學教授除國子博士監祭殿上有劉生被酒失儀集請削其籍大臣有爲劉謝者仁宗時在東宮傳諭勿竟其事集言國學禮所自出此而不治何以爲教竟移詹事院黜之仁宗益以爲賢及卽位

改太常禮儀院博士時拜住爲院使間問禮器祭義集備言先王制作及古今因革損益之由拜住歎服俄遷集賢修撰因會議學校集上議曰師道立則善人多學校者士之所受教以至於成德達材者也今天下學官猥以資格授強加之諸生上而名之曰師爾有司弗之禮生徒弗之信於學校無益也如此而望師道之立可乎下州小邑之士無所見聞父兄所以導其子弟初無必爲學問之實意師友之游從亦莫辨其邪正然則所謂賢材者非自天降地出安有可望之理哉莫若使守令求經明行修者身師尊之至誠懇惻以求之其德化之及庶乎有所觀感其次則求夫操履近正而不詭異駭俗者確守先儒經義師說而不敢妄爲奇論者衆所敬服而非鄉愿之徒者延而致之日諷誦其言使學者習之八耳著心以正其本則他日亦當有所發也其次則取鄉貢至京

師罷歸者其議論文藝猶足聳動人非若泛泛莫知根柢者矣累
除翰林待制兼國史院編修官英宗卽位集以憂還江南時拜住
爲丞相言於上遣使徵之比趨朝而拜住已遇害泰定初除國子
司業遷秘書少監充禮部考試官集言於同列曰國家科目之法
諸經傳注各有所主將以一道德同風俗非欲使學者專門擅業
如近代五經學究之固陋也聖經深遠非一人之見可盡試藝之
文惟其高者取之不必先有主意若主意先定則求賢之心狹而
差自此始矣後再爲考官率持是說故所取每稱得人帝幸上都
命集與侍讀學士王結執經以從自是歲嘗在行俄拜翰林直學
士兼祭酒侍經筵嘗因講罷論京師恃東南海運竭民力以航不
測非便乃進議曰京師之東瀕海數千里北極遼海南濱青齊荏
葦之場也海潮日至淤爲沃壤宜用浙人之法築堤捍水爲田聽

富民欲得官者合其衆分授以地官定其畔以爲限能以萬夫耕者授萬夫之田爲萬夫長千夫百夫如之察其惰者而易之一年勿征也二年勿征也三年視其成按地之高下定其額朝廷以次漸征之五年有積蓄命以官就所儲給以祿十年佩之符印俾得傳子孫如軍官法則東西民兵數萬可近衛京師外禦島夷遠寬東南海運以紓疲民遂富民得官之志而獲其用江海游食盜賊之類皆有所歸矣其後海口萬戶之設大畧宗之文宗卽位改奎章閣侍書學士兼職如故嘗以先世墳墓在吳越者歲久湮沒乞一郡自便帝曰以爾之材何施不可顧今未可去爾時關中大饑帝問集何以救對曰承平日久人情晏安有志之士急於近效則怨讟興焉不幸大菑之餘正君子爲治作新之機也若遣一二有仁術知民事者稍寬其禁令使得有所爲隨郡縣擇可用之人因

舊民所在定城郭修閭里治溝洫限畝畝薄征斂招其傷殘老弱
漸以其力治之則遠去而來歸者踵至春耕秋斂皆有所助一二
歲間勿征勿徭封域既正友望相濟是三代之民將見出於空虛
之野矣帝稱善因進曰幸假臣一郡試行此法帝不允有旨諸兼
職不過三免集國子祭酒會修經世大典命爲總裁中丞趙世安
嘗謂集久居京師病曰宜假一外職就醫文宗怒曰一虞伯生汝
輩不能容邪閱歲書成既上進以日疾丐解職亦不允時帝方嚮
用文學雅重集不聽其去而嫉之者往往摘集文辭指爲譏訕帝
皆察知其故不能中傷

東山集云嘗被旨撰一佛寺記其處有前代遺蹟上問曰人言汝前代相臣子孫今爲是交適美前事耳對曰前代遠矣其臣

庶子孫有能不忘祖父事者必忠孝上

也臣不足以及此上曰一侍臣嘆異之

貴近傳旨其人素忌集謬言制封營國公集具橐進丞相愕然集
知爲所給卽請易橐終不明言其故凡論薦人材必先器識心所

未善不為牢籠沽譽御史中丞馬祖常嘗出牘求薦光人龔伯璫
 集曰是子非遠到器恐不得合終乃大拂祖常意後果事敗身僇
 如集言先是安權貼睦爾者明宗長子也文宗忌之放之靜江詔
 書有曰明宗在北時自以為非其子蓋集筆也及文寧二帝相繼
 崩召諸老臣赴上都議所立集與焉祖常使人諷集曰御史有言
 矣乃謝病歸臨川順帝元統二年召還侍臣有以舊詔言者帝曰
 此吾家事豈有彼書生邪時集疾作竟不至屢被旨即其家撰文
 褒錫勲舊卒封仁壽郡公諡文靖生平折節下仕接後進雖少賤
 如敵已東山集云太史院教授楊茂宏知置律候氣之事嘗與郭守敬試用之而驗以為律歷
 不可偏廢將為書上之自恨文繁不足達意求集潤色集既為整飭其文又以告諸有
 位當權門赫奕未嘗有所附麗集議中書正言讜論多見容受屢
 以片言出人於濱死亦不自為德家素貧歸老後兼作方外交登
 門之士相望於道其束脩羔鴈之入還供賓客費雖空乏弗恤也

輟耕錄云錢唐道士張雨居茅山素善詩自號句曲外史集一見絕不與談詩世問能作
幾家符篆兩曰不能集曰某試書之以質是否連書七十二家兩輒下拜稱弟子終身 早歲

與弟槃闢書堂為一室書陶淵明邵堯夫詩於壁左曰陶庵右曰

邵庵故世稱邵庵先生有道園學古錄五十卷輟耕錄云集與楊載同在京載每言伯生不能詩集

置酒請問作詩法載酒酣盡為傾倒集遂超悟其理繼以所作詩介他人質諸載載曰此詩非真伯生不能或曰先生嘗謂其不能詩何以有此曰伯生學問高余曾授以作詩法餘莫能及故國

朝詩稱虞楊范揭焉嘗有問集者曰載詩如何集曰如百戰健兒棹詩如何曰如唐臨晉帖侯斯詩如何曰如美女簪花先生詩如何笑曰虞集乃漢廷老吏蓋未免自負公論亦以為然 書史

會要云集真行草篆皆有法度古隸為當代第一 弟槃字仲常以進士除湘鄉州判官性癖古

有巫至稱神降告其人曰某方火果火忽又曰將大水且兵至州

大家爭驚徒槃察知曰此輩將惑民為亂安有神乎捕治之得黨

數十人論如法槃少時讀柳子厚非國語以為國語誠可非而柳

子之說亦非也著非非國語至詩書春秋皆有論述而春秋乃其

家學故尤善每詣集聞僧道在座輒去雖集亦嚴憚之

冊曰文本正大怪奇則否辭達意明自不朽學校之議切

中獎數言語政事當時誰偶二難一家教由賢母

范梈字德機清江人家貧早孤母熊氏教之學梈天資朗異雖癯

若不勝衣而卓然自樹於流俗居則固窮以養親出則假陰陽之

技以給旅食耽詩文用力刻苦人罕知者年三十六始北遊賣卜

燕市中丞董士選延之家塾薦為翰林編修官改閩海道知事閩

俗淫巧文繡局多取良家女充繡工梈作詩歌述其弊廉訪使取

以上閩皆得罷遣其辭曰閩州上俗戶不分生子數歲學繡文圍綳坐肆雜男女誰問小

一似鷄羊羣古來閩閩佩箴管今者女工徵六軍雖復太平少征戰設有備豫將何云去年居作

五千匠耗費府藏如烟雲官胥培克膏十八况以鳩斂奪耕耘祇今棄置半不用民勞竟是誰懼

忤歲歲條章省煩費幸且不省無方殷唐虞在上儉且勤後王猶復錦繡被

此有夔龍讓姚宋不言忍使憂心熏觀風自是使者職作歌雖遠天應聞

家新喻百丈山文宗天歷二年遭母喪相繼卒臨川吳澄志其墓

謂特立獨行可方東漢諸君子縣志云有燕然東方海南豫章侯官江夏百

揭傒斯字曼碩江西富州人父來成宋鄉貢士傒斯幼貧惟父是

師讀書尤刻勵由是貫通百氏早有文名成宗大德間稍出游湘漢程鉅夫為湖南憲長器重之妻以從妹仁宗延祐初薦授國史院編修官時平章李孟監修國史讀所撰功臣傳嘆曰是方可名史筆他人直膽吏牘爾轉應奉翰林文字仍兼編修遷國子助教復留為應奉前後三人翰林臺閣典章靡不諳練天歷初開奎章閣首擢授經郎教勳戚大臣子弟文宗時幸閣中多所咨訪中書每奏用儒臣必問曰其才何如揭曼碩一日出僎斯所上太平政要策圭齋集云凡四十九章示臺臣曰此朕授經郎揭曼碩所進也東山集云時學士虞集博士柯九思當侍從討論法書名畫僎斯亦在列眷稍疎因潛著一書曰奎章政要以進預修經世大典文宗取其所撰秋官憲典閱之曰此豈非唐律乎特授藝文監丞參檢校書籍事順帝元統初累遷集賢學士奉命祀北嶽濟瀆南鎮便道西歸除奎章閣供奉學士未至改翰林直學士同知經筵事時新格超升不得越

二等俟斯連進四等轉九階皆帝親擢也經筵無專官多大臣兼領而微辭奧義必屬俟斯撰定帝嘉其才數出金織文幣以賜至正三年年七十致仕去行至鄒南召還撰明宗神御殿碑文既成復求去帝命丞相脫脫慰留之對曰使俟斯有一得之獻諸公用其言而天下蒙其利雖死此無恨不則何益之有丞相問方今政治何先曰儲才爲先養之位望未降之時用之周歷庶務之後則無失材廢事之患矣詔修宋遼金三史充總裁官丞相問修史以何爲本曰用人爲本有學問文章而不知史事者不可與有學問文章知史事而心術不正者尤不可與則用人之道當以心術爲本且與僚屬言欲求作史之法須求作史之意古人作史雖小善必錄小惡必記不然何以示懲勸由是毅然以筆削自任凡政事得失人材賢否一律以是非之公至物論之不齊必反覆辨論求

歸至當而後止踰年遼史成有旨獎諭仍督早成宋金二史侯斯

留宿史館朝夕不敢休因得寒疾七日卒追封豫章郡公諡文安

侯斯少處窮約事親菽水粗具而必得其歡心暨有祿入衣食稍

踰舊輒愀然曰吾親未嘗享是也故平生清儉至老不渝歐陽元墓誌云在京師三

紀出入未始乘馬為授經郎每早作宮門辨色輒先至諸貴游見其徒步謀為之贊馬侯斯聞之自置一騎尋復鬻之以示非所欲立朝雖居散地而急

於薦士揚人之善惟恐不及為文叙事嚴整語簡而當詩清婉麗

密元詩選載秋宜集多樂府古辭善楷法兼工行草朝廷大典則必以命焉補子泫

字伯防由翰林編修仕至燕南廉訪副使風尚通雅正書得用筆

意孫雲字之德正書學智永見書史曾嬰

冊曰求筆削才古維三長本於心術握要尤良至今三史垂

論煌煌辭嚴義博班馬可方

周仁榮字本心台州臨海人父敬孫宋太學生與同郡楊珪陳天

瑞車若水黃超然朱致中薛松年師事金華王栢受性理之旨嘗

著易象占尚書補遺春秋類例諸書仁榮承家學治易禮春秋而

工為文章用薦者署美化書院山長美化在處州萬山中人鮮知

學仁榮舉行鄉飲酒禮士俗為之一變後辟江浙行省掾史省臣

皆呼先生不以吏遇之泰定初由國子博士遷集賢待制奉使代

祀嶽瀆至會稽以疾卒其所教弟子多名人而泰不華為進士第

一 輟耕錄云仁榮築一室纒落成友人楊公道與疾至門曰願假君新宅以死即讓正寢居之未幾果死箱財莫有主者楊之弟詣仁榮求分財謝曰若兄寄死於我意固在是喪事之費自己

出則家判籍自平陽呼其子來悉與之又買地府城朔義塾築礎時掘地獲雙硯硯石欵識乃唐鄭司戶虔故物塾既成遂名雙硯堂 書史會要云仁榮楷書宗歐率更為時所重

郡孟夢恂字長文與仁榮同師事楊珏陳天瑞夢恂講解經旨體

認親切府志云以薦署台州學錄有詩竹牛入市觸殪官馬夢恂曰兵兆也順帝至正中紅巾盜起豫陳備禦

策救鄉郡有功授宜興州判官未受命卒賜諡康靖先生著性理

本旨四書辨疑漢唐會要七政疑解及筆海雜錄五十卷

宇文公諒字子貞其先成都人後徙吳興幼有操行通經史百氏言弱冠館富民家夜半聞叩門聲聞之婦人也公諒厲聲叱去明

旦即以他事辭歸終不言其故文宗至順四年登進士第授同知

婺源州事懷初錄云公諒初領鄉貢入浙省試院頭場占一席舍其案上有宇文同知四字不知何人書試官閱卷以文不中式將黜之時座主龍驤川江西老儒也年八十

餘始過江浙力主此卷卒並榜中及會試果登高第後補餘姚州夏不雨公諒出禱輒應歲以有年

民頌之為則駕兩省儼察實松江海塗田公諒以潮汐不常後必

遺患請一槩免科行肖從之遷國子助教日與諸生辨析經義六

館之士資其陶甄百往往出為名臣調國史院編修官出僉嶺南

廉訪司事以疾請老平居雖暗室必正衣冠端坐嘗挾手記一冊

識其編首曰晝有所為暮則書之其不可書者即不敢為也所著

有折桂集觀光集璧水集以齋詩橐玉堂漫橐越中行橐凡若干

卷門人私謚曰純節先生

李洞字漑之滕州人生有異質始從學卽穎悟強記作爲文辭如宿習者姚燧見其文嘆異薦授國史院編修官以親老就養江南久之辟中書掾累除太常博士拜住爲相聞其名擢監修國史長史泰定初改翰林待制以親喪未葬辭歸天歷初復以待制召時文宗方開奎章閣延天下名士洞數見奏對稱旨特授奎章閣承制學士旣爲帝知遇乃著輔治篇以進文宗嘉之朝廷有大議必使與焉會修經世大典洞方臥疾卽強起曰此大制作也吾何可不預力疾同修書成旣進奏旋謁告歸再除翰林直學士竟以疾不起洞秀眉疎髯目瑩如電顏面如水玉唇若渥丹望之者疑爲神仙中人爲文奮筆揮灑縱橫疊出若紛錯而有條理每以李白儼僑居濟南有湖山花竹之勝作亭曰天心水面文宗敕虞集爲之記尤善書自篆隸草真皆精詣爲世所珍愛有文集四十卷

書史會要三書
有晉宋承法

曹鑑字克明大都宛平人弱冠南遊具通五經大義成宗大德中
用學士郝彬薦為淮海書院山長南臺中丞廉恒辟為掾史除興
文署伴送安南使者歸國途中問難倡和應答如響使者嘆服以
為中國有人英宗至治初授江浙行省員外郎順帝元統二年除
同僉太常禮儀院事集議明宗皇后祔廟事援禮據經甚悉官至
禮部尚書卒封譙郡侯諡文穆鑑歷仕三十餘年僦屋以居蓄書
數千卷皆手自較定為詩賦尚騷雅作文法西京每篇成學者爭
相傳誦有文集若干卷嘗自浙調湖廣員外有故掾顧淵伯較耕錄
作手簿
白顧淵以辰砂一包餽鑑漫置笥中半載後視之有黃金三兩雜其
內鑑驚嘆曰彼以我為何如人也時淵伯已沒即呼其子歸之
黃潛字晉卿婺州義烏人母童氏夢大星墜懷有娠歷二十四月

始生潛比成童授以書詩不一月成誦迨長以文名於四方

兩史云性篤孝

母沒營冢城有乳虎馴狎之異

延祐開科登進士授台州寧海丞縣地瀕鹽場亭戶恃

不統於有司好凌轢鄉井編戶隸漕司及財賦府者尤驕橫潛一

繩之法吏怵以利害弗顧也文宗至順初八為應奉翰林文字轉

國子博士視弟子如朋友未始以師道自尊輕納人拜時欲增設

禮殿配位四配位合東坐西向學官或議分置左右同列不敢爭

潛獨面折之事乃止尋提舉江浙儒學每月俸不給恒鬻產以佐

其費年六十七亟請納祿歸俄除翰林直學士兼經筵官執經進

講者三十有二言多切直帝嘉其忠轉侍講學士累章乞休不俟

報竟去帝遣使追還復留為前官未幾堅謝病歸優游田里者數

年卒年八十一追封江夏郡公諡文獻潛素行挺立歷仕五朝疑

然以斯文為己任足不登鉅公勢人門一時服其介節為文頃刻

數百言剖析經史疑義及古今因革制度名物之屬旁引曲證多
先儒所未發臨川危素稱其布置謹嚴俯仰雍容不大聲色譬之
澄湖不波一碧萬頃蛟龍百怪潛伏不動而淵然之光自弗可犯
著日損齋藁三十三卷義烏志七卷筆記一卷邑人立祠祀之史書

會要云書不薛晉公自成一家一統志云師常山教諭王炎澤故其學有本

柳貫字道傳婺州浦陽人嘗受經於仁山金履祥垂老好學不倦

凡六經百氏兵刑律歷術數方技靡不通究作文沉鬱春容涵肆

演迤多為人傳誦名賢錄云能鑿定古成宗大德中用察舉為江山教諭

既而召為翰林待制到官七閱月而卒元詩選云貫至京為吳澄所器程鉅夫

自號烏蜀山人門人私謚曰文貫嘗與黃潛及虞集揭傒斯齊名號儒林四

傑著字系二卷近思錄廣輯三卷金石竹帛遺文十卷書史會要云工

吳棻字立夫世居婺州集賢大學士直方子也幼羸弱雙瞳碧色

爛爛如巖下電七歲能賦詩

宋濂墓碑云初母盛氏懷娠父夢西域神人飛空而來翼日萊生因名曰來年四歲母授以書輒成誦同郡方

鳳一見奇之曰此邦家材也取南山有臺詩中語更今名

嘗往族父幼敏家日易漢書一帙以去幼敏指

谷永杜鄴傳叩之萊琅然背誦不遺一字三易他編皆如初因盡

出所有書使讀之延祐七年以春秋舉上禮部不利退居深褒山

中益窮諸書奧旨

西史云出北海東洲歷蛟門峽過小

著尚書標說六卷春秋

世變圖二卷春秋傳授譜一卷古職方錄八卷孟子弟子列傳二

卷楚漢正聲二卷樂府類編一百卷唐律剛要三十卷生平喜論

文嘗云作文如用兵兵法有正有奇正是法度要部伍分明奇是

不為法度所縛千變萬化坐作進退擊刺一時俱起及其欲止什

伍各還其隊元不曾亂聞者服之

元詩選云偶過故人家見几上唯刻紙數千番戲為長歌頃刻而盡觀者驚以為神人或以古

文試之察其辭氣即知為某代某人所作

柳貫素慎許與每稱萊為絕世才黃潛晚年謂人曰

萊之文斬絕雄深類秦漢間人作吾操觚一世安敢及之御史行

部舉茂才署饒州長蕪書院山長未上而卒年僅四十四

碑云門人宋濂胡翰

等私諡曰淵穎先生

歐陽元字原功其先家廬陵後遷潭州之瀏陽幼岐嶷母李氏親授孝經論語小學諸書八歲能成誦始從鄉先生張貫之學即知屬文生十歲有黃冠者見之曰是兒神氣疑遠日光射人當以文章冠世部使者行縣以諸生見命賦梅花詩立成十首晚歸增至百首見者異之稍長益從宋遺老習為詞章經史百家靡不研究

伊洛諸儒源委尤為淹貫

元明善行狀云父龍教授道州元侍行道為周敦頤鄉里儒風尤盛元日從游學力銳進虞集為國子助教其父汲

教授潭州見元文擊節于封一帙寄集曰他日當與汝齊名故元未至足師而聲與卓著

成仁宗延祐首科進士授平江州同

知調蕪湖尹數決疑獄教化大行飛蝗不入其境尋調武岡尹縣

當蠻獠雜居甫至赤水太清兩洞聚眾相攻元單騎馳諭眾棄兵

仗羅拜曰我曹非不畏法蓋常訴事於縣縣官不為直致發憤爭

殺耳因喻以禍福歸理其訟獠人遂安入為國子博士累遷翰林待制兼國史院編修官文宗天歷初軍興旁午元日直內廷凡遠近調發制詔書檄以至郊廟建后立儲肆赦之文皆出其手初置奎章閣學士院又置藝文監隸焉文宗親署為藝文少監纂修經世大典元言孔思晦襲封衍聖公爵最五等秩登三品而用四品銅章不稱帝是其言改鑄從三品印給之順帝元統初歷僉太常禮儀院事拜翰林直學士編纂四朝實錄俄兼國子祭酒至元五年以翰林學士告歸詔修宋遼金三史起為總裁官危素墓碑云廟堂削修史之要元曰是猶作室在於聚材擇臣則必遴選史官發凡舉例俾論撰者有所據依史官中有露才負氣持議不公者元不以口舌爭俟其呈橐援筆寫定往往媿服至論贊表奏皆親自屬筆超拜翰林學士承旨以足疾屢求退不允除福建廉訪使中途乞休作南山隱居有終焉之志復拜承旨力辭

不獲奉勅定國律尋乞休陳情懇切特授湖廣右丞致仕將行復降旨不允汝穎盜起蔓延南北元獻招捕策千餘言當事不能用久之得致仕以中原道梗欲由蜀還鄉帝復不允時將大赦召元草詔人病不能行命肩輿至延春閣實異數云卒年八十五追封楚國公諡曰文元歷官四十餘年三任成均兩官祭酒六入翰林三拜承旨兩知貢舉預修實錄大典三史金繪上尊之賜幾無虛歲海內名山大川釋老之宮王公貴人墓隧之石藉其片言爭爲瑤重有圭齋集行世

綱鑑云著有唐書彙纂要 宋濂圭齋集序云白揮第以來多至自歸冊藏劉陽里第盡毀于兵此則在燕所錄自辛卯至丁酉七年間所作

冊曰古大手筆聿稱燕許圭齋視草允堪鼎峙片言之出奉如至寶實以敷華文爲載道

陳旅字衆仲興化莆田人多稟穎異稍長至溫陵從鄉先生傅古直游聲名日著以薦爲閩海儒學官御史中丞馬祖常使泉南一

見奇之謂曰子館閣器也胡留滯此因勉游京師虞集見其文慨

然曰此所謂我老將休付子斯文者矣即延至館中朝夕相講習

自謂得友道園學古錄云自眾仲來凡問學修己之事有益於愚陋多矣平章趙世延力薦之遷國子助教

居三年考滿諸生不忍其去請再任焉順帝元統初出為江潮儒

學副提舉至元中除應奉翰林文字遷國子監丞旅於文自先秦

以來至唐宋諸大家無所不究故其文典雅峻潔必求合古作者

有安雅堂集十四卷書史會要云旅善古隸而行楷亦有法旅感集為知己當在江潮時歲

且大比親奉書幣請集主文闡衝冒炎暑千里至臨川集感其來

留旬日惓惓以斯文相勉既而聞旅卒深痛悼之同時有程文陳

繹曾皆名士文字以文徽州人年六十始授國史院編修官由

南臺御史遷禮部員外郎作文明潔而精深集亦多稱之一統志云白號黔南

生有文集三十八卷繹曾字伯敷處州人口吃而精敏諸經注疏多成誦文

辭汪洋浩博其氣淳如官國子助教論者謂二人皆與旅相伯仲

書史會要云繹曾學識優博
真草篆隸值通習各得其法

劉誥字桂翁吉安廬陵人歐陽元墓碑云其先自清江之翟斜徙居吉水之南嶺幼失父知自樹立既

冠重厚醇雅素以師道自居教學者有法聲譽日隆江南行臺屢

以遺逸薦不就為文根柢六經躡躑諸子百家融液今古而不露

其踔厲風發之狀四方求詩文者踵其門所著有桂隱集順帝至

正十年卒年八十三賜諡文敏碑云誥之為德不為世俗所播歛不為風聲氣習所淪染卓然與鄒魯士埒而無作容事諸父昆弟

盡恭敬友愛先世
恒產悉推讓子姪同郡龍仁夫字觀復劉岳申字高仲皆與誥齊名

而仁夫之文尤奇逸流麗所著周易集傳多發前儒所未發用薦

者以岳申為遼陽儒學副提舉仁夫為江浙儒學副提舉皆不就

李孝光字季和一作和温州樂清人少博雅篤好古文辭隱居鴈蕩山

四方士遠來受學至正七年詔徵隱士以秘書監著作郎召赴京

師見帝宣文閣進孝經圖說順帝大悅賜上尊明年授秘書監丞
 卒于官孝光以文章負重名其屬文必法古非先秦兩漢語弗以
 措辭有文集二十卷鴈山干記一卷傳世

孫轍字履常江西臨川人幼孤母蔡氏教之學即警策自勵比長
 行詣純篤事母孝居家教授門庭蕭然而考德問業者日盛部使
 者長吏以下至必先造謁轍樂易莊敬接之以禮言不及官府事
 意可屢辟不就齊履謙奉詔舉遺逸于江西特以轍應歲致廩餼
 皆不受人稱淡軒先生善為文吳澄嘗序其集以為仁義之人其
 言藹如也元統二年卒 同郡吳定翁字仲谷清修文雅特與轍

齊名而尤善詩揭傒斯嘗稱其幽茂疎澹可比盧摯御史臺辟薦
 相望終不出年九十餘卒惟召子孫輯其遺文不及他事嘗曰士

無求用於世惟求無媿於世人以為名言

書史會要云盧摯字處道涿郡人元初稱能詩者以摯為首官翰林

學士有疎齋
集亦善書

杜本字伯原其先居京兆後徙江西之清江通諸經尤精皇極之

學行省丞相忽刺木得其所上救荒策奇之及八為御史大夫力

薦於武宗被召至京師不果用歸隱武夷山中武夷志云結思學子齋文宗

即位以金織文幣徵之不起志云釋周書無逸順帝至正三年丞相脫

脫奏授翰林待制使者致君相意趣之行強應命至杭州稱疾固

辭上書丞相曰公能以萬事合為一理以萬民合為一心以千載

合為一日以四海合為一家則可與言制禮作樂躋五帝三王之

盛矣竟不行仍歸武夷築室平川上居之平昔所作詩文多不存

稿或問之笑曰觀藝文志所載古人文集何翅千百今其傳者百

無一二故知不必存也所著有四經表義六書通編十原等書其

詩名清江碧嶂集學者稱為清碧先生輟耕錄云本有所編五聲韻自大小篆

分隸真草以及至外番書及蒙古新字麻

不收錄題曰華夏同音浙省平章饜饜時來訪一日語及聲律之學因問國字何以用可侯字為首本曰正如嬰兒初墮地時作此一聲乃得天地之全氣也不章甚悅服之書史會要云工楷書

尤精
隸篆

張樞字子長婺州金華人幼聰慧外家潘氏蓄書數萬卷樞盡取

讀之過目輒不忘既長肆筆成章頃刻數千言有問以古今沿革

政治得失宇宙之分合禮樂之興廢以至帝號官名歲月先後歷

歷如指掌為文務推明經史以扶翼世道尤長於紀事嘗取三國

時事撰漢本紀列傳附以魏吳載記為續後漢書七十三卷以正

陳壽之失是非予奪咸有論斷繫各篇之後名曰訓志臨川危素

稱其立義精密可備勸講朝廷取其書寘宣文閣順帝至正初徵

修三史以翰林修撰官辟召不就使者強之行至杭州固辭歸嘗

著春秋三傳歸一義三十卷刊定三國志六十五卷林下竊議一

卷歌詩雜著名敝帚編名賢錄云樞以宋末仗節諸人多又氏所不載乃詢諸故老

作宋季逸事自將相諸臣以至士子婦女之死者莫不備錄

冊曰諸君炳炳為時儀刑脫屣富貴潛心汗青務敦實學豈

盜虛聲

蘇天爵字伯修真定人父志道歷官嶺北行省郎中

虞集墓誌云伯和林右脈僂助國諸善政

天爵由國學生中公試名第一

宋本滋溪書堂記云以碣石賦中公試

授薊州判官泰定元

年擢應奉翰林文字至順元年預修武宗實錄改南臺御史慮囚

湖北湖北地僻遠天爵冒瘴毒徧歷其境囚有言寃狀者輒為之

太息每事詳究雖暑夜猶篝燈治文書不倦順帝元統初拜監察

御史在官數閱月疏凡四十五上大畧謂法令朝廷所定廷尉天

下之平或笞或杖受宣者必申稟中臺或降或黜無例者必定擬

刑部是慎重守法不敢輕於用刑今動輒曰省院臺勿用則當用

者宣政資政之選乎是降為雜職矣又曰有選衙門勿用無選者

孰敢用乎是不復得叙矣且職官犯賊猶有一貫至三百貫之分

至論其罪則有殿降叙不叙之別豈有一遭論奏或犯在革前或
 事涉疑似輒坐雜職任用之科終身不叙之列豈法之平允哉且
 犯罪至於流遠家屬尚留京師被劾未至當刑起遣即歸鄉里蓋
 緣無事可尋強生掇拾潔白素著特為染污致使高尚之人聞而
 退藏有志之士亦為斂避當路興乏全才之嘆後世有國無人之
 譏其於世道甚有關係前後所劾者五人所薦舉百有九人預修
 文宗實錄遷翰林待制尋除中書右司都事兼經筵參贊官至元
 六年遷吏部尚書參議中書省事是時朝廷更立宰相庶務多所
 弛張天爵言無顧忌夙夜謀畫鬚髮盡白至正四年由西臺侍御
 史召為集賢侍講學士兼祭酒自以起家諸生進為師長端已悉
 心以範學者明年奉使宣撫京畿究民疾苦名臣奏議云奏免江浙遼陽
山東河北諸郡饑民免稅其
 興除者七百八十三事糾劾者九百四十九人以忤時相意坐不

稱職罷七年復起江浙參政改大都路都總管以疾歸俄起爲兩浙都轉運使十二年紅巾賊自淮右蔓延江東詔仍江浙參政總兵饒信間恢復一路六縣以憂卒于軍嘗著國朝名臣事畧十五卷元文類七十卷爲文長於紀載平易溫厚詩尤得古法時中原前輩凋謝殆盡天爵獨身任一代文獻之寄討論講辨雖老弗倦學者稱爲滋溪先生有松廳章疏五卷春風亭筆記二卷遼金紀年黃河原委未及脫稿云先是天爵在史局時請修功臣列傳疏曰史有二體編年始於左氏紀傳始於史遷考一時之得失則編年爲優論一人之始終則紀傳爲備二者皆不可闕近代作爲實錄大抵類乎編年又於諸臣薨卒之下復爲傳以繫之所以備二者之體也我國家至元間初撰祖宗實錄於時諸臣多在及元貞初詔修世祖實錄命中外大小臣僚各具事迹錄送史館蓋欲紀

述一代之事寓修諸臣列傳然以進史期迫諸臣事實不完遷延至今竟不果作向修經世大典臣事之見於簡冊者十居二三矧今翰林職專筆削若復曠日引年不復紀載將見勲舊盛烈泯沒無聞爲史官者無所逃其責矣此列傳之必當修也昔司馬遷爲太史令網羅天下放佚舊聞遺文古事靡不畢集於是據左氏國語采世本戰國策述楚漢春秋究天人之際通古今之變成一家言宣布於世其文直其事核不虛美不隱惡故謂之實錄焉夫史固欲其核實事尤貴於網羅今史館修書不過行之有司俾之采錄或功臣子孫衰替無人或有司憚煩奉行不力事之卒不能具者此也今史官先當取具國初以來至於某年中間功臣當立傳者若而人各具姓名或卽其子孫宗族或卽其親舊故吏或卽其居官之所指名取索其人自當具報不許有司因而煩擾又諸公

所有遺文或已刊行開具模印其未刊版者令有司卽其家抄錄申達史館嚴立程限違者罪及提調官吏庶幾事無所遺汗青有日矣至官品固有高下人材則無貴賤作史者本欲紀載賢能用爲法勸初豈別其貴賤輒爲等差故趙周旣貴姓名止見於當時黃憲雖微善行永傳於後世近自金源以來始以官至三品者行事登於史是使忠烈隱逸之士凡在下位者皆不得書又何以勸善乎其法之謬以至如此今一品以上止有官階別無事迹自可削去三品以下或守令之賢績可紀或隱逸之著述堪傳或人子事親若王祥之孝感或義士赴難若南霽雲之殺身並宜登載於編以爲將來之鑑且史之爲書善惡並載蓋善者所以爲勸惡者所以爲戒也後世史臣亦云誅姦諛於旣死發潛德之幽光今修史條例止見采取嘉言善行則姦臣賊子之事將不復登於書彼

姦臣者固不卹其書與否也今且從而泯滅之是使姦計得暴行
 於一時無所垂示後世彼又何憚而不為惡乎即如阿合馬桑哥
 鐵失倒刺沙之流皆當明著其欺罔之罪弑逆之謀庶幾人心知
 所警畏然諸家所具事迹多出孝子慈孫之言門人故吏之手恐
 有不實又當參以刑曹之過簿吏部之行止則善惡備書而無虛
 美隱惡之譏矣惜其說不果行見名臣奏議

罔曰糾邪舉正讜言諤諤發必中竅煩不憚索明體達用不
 愧所學

貢師泰字泰甫寧國宣城人父奎以文章名家延祐至治間累官

集賢直學士卒諡文靖一統志云所著詩文有雲林稿倦游集師泰早入胄監為諸生泰定

四年釋褐出身授太和州判官以薦擢應奉翰林文字除紹興路

推官山陰自洋港忽一船飄近岸有史甲者取鹵海濱見船無主

因取其篙櫓船中有一屍旁觀者指爲史所殺史備富民高家史
既誣服高亦就逮師泰密詢之則里人曰自海口因盜網中魚爲
漁者所殺其寃始白游徼徐裕以巡鹽爲名一日遇諸暨商奪其
所賣錢撲殺之投屍水中走告曰頃獲私鹽犯畏罪赴水死師泰
驗其屍有傷追詢具得裕殺人狀以故治行爲諸郡第一考滿復
入翰林爲應奉預修后妃功臣列傳累遷監察御史順帝至正十
四年除吏部侍郎時江淮兵起奉命和糴浙中得糧百萬石以給
軍朝廷以燕京至上都驛戶凋敝命巡視整飭至則驗貧富均徭
役民賴以蘇出爲平江路總管甫視事張士誠自高郵抵城下攻
圍急守將遁去師泰亦懷印亡匿海濱

名賢錄云隱居吳淞江易
姓名作幽懷賦以自見

江浙行

省丞相達識帖睦爾命權本省參政十九年除戶部尚書俾分部

閩中以閩鹽易糧十萬石由海道轉漕京師朝廷賴焉未幾召爲

祕書卿行至杭之海寧州卒

錄云自閩浮海還寓州東湖塘村名其里曰小桃源卒塋村南

師泰既以文字

知名尤喜接引後進不問識與不識輒加推轂一時士譽翕然歸

之所著詩文名玩齋集

書史會要云楷書亦善

周伯琦字伯溫

書史會要云號正雪坡真逸

江西鄱陽人父應極仁宗為皇太子召

見獻皇元頌為言於武宗授翰林待制伯琦自幼從宦游京師入

國學以蔭授南海主簿三轉入翰林修撰順帝至正元年改宣文

閣授經郎教威里大臣子弟每進講輒稱旨且日被顧問帝以其

工書法命篆宣文閣寶仍題榜額及摹王羲之書蘭亭序并智永

所書千文刻石閣中

圭齋集云帝得智永千文命近臣摹勒刻置宣文閣所搨墨本從官之有文者則識以閣寶賜之

懸南集云宣文閣勒石搨本

草書凡三百七十字真書凡二百五十五字

會御史臺奏風憲宜用近臣特命僉廣東廉訪司

事八年仍召還翰林預修后妃功臣列傳自世祖以後省臺之職

南人斥不用至是始復舊制南士皆得居省臺遂與貢師泰同擢

監察御史以兩人皆南士之望也先是紅巾盜起丞相脫脫奏以
其弟御史大夫也先帖木兒統大軍南討失律喪師西臺御史劉
希曾等十二人共劾其罪伯琦承丞相意奏希曾等越分子譽皆
坐左遷補郡判由是不為公論所與明年遷崇文太監兼檢校書
籍事奉命至姑蘇祀海口漕神廟親為記書之未幾出為江夏廉
訪使長鎗軍鎖南班陷寧國伯琦倉皇出見尋遁走杭州十七年
江浙行省達識帖睦迺假伯琦參知政事往招張士誠士誠留之
平江十餘年乃得歸鄱陽尋卒伯琦博學工文章尤以篆隸真草
擅名嘗著六書正譌說文字原二書梓于平江路儒學天都載云初改
奎章閣為宣文

朝臣咸謂必命嚶嚶書勝時周伯琦雖在館閣精篆書未為上知嚶嚶曰令書宣文閣勝十數紙
周不識其意一日有旨命嚶嚶書閣勝辭曰臣所能者真書不古古莫如篆周伯琦篆書今世無
過之者上如其言子宗仁字克復官山東行省郎中篆書宗其家學然

不逮父剪勝野聞云士誠面縛見太祖伯琦遜伏于後上
曰元君裔汝以心膂乃資賊亂耶賜醉而殺之

用曰學期致用裨國拯民游藝逢時豈士之真二人譽望大畧相均折之以道貢爲嶙峋

張翥字仲舉晉寧人父爲安仁尉後調杭州鈔庫使因家焉少負才豪放不羈好蹴踘喜音樂不以家業屑意父深以爲憂一旦翻然曰大人勿憂今請易業矣乃謝客閉門讀書晝夜不輟時李存家安仁雅好古文辭翥從之受業多所研究未幾留杭州又從仇遠學遠於詩最高翥得其聲律之奧遂以詩文鳴於時後至元末同郡傅巖起居中書薦翥隱逸授國子助教分教上都尋退居淮東會修宋遼金三史起國史院編修官史成歷應奉修撰累遷翰林侍講學士兼祭酒翥勤於誘掖絕去崖岸有質以經義者必歷舉衆說爲之折衷每論辨輒雜以談笑無不厭其所得後已嘗詣中書議時政衆論蠶起翥獨默丞相搆思監曰張先生平日好論

事何不出一語對曰諸人之議皆是但事勢有緩急施行有先後在丞相自決耳以翰林學士承旨致仕當字羅帖木兒之擁兵入都也強翥草詔削奪擴廓帖木兒官爵且發兵致討翥不從或勸之翥曰吾臂可斷筆不能操也字羅既誅詔以翥爲河南平章仍翰林承旨致仕給全俸終身卒年八十三翥長於詩其近體長短句尤工文不如詩而每以文自負嘗語人曰吾於文已化矣蓋吾未嘗構思特任意屬筆耳他日學士沙刺班示以文請易置數字苦思移時終不就沙刺班曰先生於文豈猶未化邪何思之苦也因相視大笑翥平日善諧謔談吐至傾一座所爲詩文甚多及死國遂亡以故遺稿多不傳傳者有蛻庵樂府僅三卷

冊曰文運隆污其氣則一與時遷流人莫之識持風起衰彬

彬文質

朱震亨字彥修金華義烏人天資爽朗讀書卽了大義聞同郡許謙之學樞衣至門師事之謙爲開明聖賢大旨震亨心解抑其豪邁歸於醇粹不以一毫苟且自恕其清修苦節絕類古篤行士所至人多化之一日母病延醫因自悟曰人子不知醫或委之庸人寧無有失於是研究醫理博求名師得羅知悌之傳治症多奇效嘗著格致餘論局方發揮傷寒辨疑外科精要本草衍義補丹溪心法諸書行世學者稱丹溪先生

李杲字明之號東垣真定鎮州人少通春秋書易博聞強記時易州張元素著珍珠囊一書以醫名燕趙間杲捐千金從之學不數年盡得其秘顧資性高蹇少所降屈非危急之疾人不敢謁也嘗援例作濟源監稅官祖珍珠囊意增以用藥凡例諸經嚮導綱要活法著用藥法象一卷謂世人惑於內傷外感混同施治乃辨其

脈證元氣陰火飲食勞倦有餘不足著辨惑論脾胃論各三卷推
明素問難經本草脈訣及雜病方論著醫學發明九卷蘭靈秘藏
五卷辨析經絡脈法分比傷寒六經之則著此事難知二卷及滌
洞集外科精義號東垣十書至今人稱朱李為一代儒醫云
本草綱目云張元素字潔古易州人為金時名醫坐主治秘訣心法要旨各珍珠囊後人翻為韻語以便記誦謂東垣所著者誤又著病機氣宜保命集四卷一名活法機要後人偽為河間劉元素所作者益謬

自軒岐載列文翰夫豈非宜

池北偶談載傅汝礪字若金詩集八卷歌行頌子美七律亦有格調不似南宋俚俗體有詩法源
流一映其妻孫淑字蕙蘭亦工詩若金有相皇烟草綠紛紛淚灑東風憶細君其悼亡作也蕭洵
廬陵八官工部郎著故宮遺錄一卷元代大內規制瞭然
畢具與楊奐注未故宮陳隨應南渡行宮三記皆足備考
日知錄云移刺迺天歷初為常州路總管刻其所點四書章句或問集註其凡例曰凡序註或問
中題頭及空處並存其舊以見當時忠敬之意如未德隆盛之類近歲新刊大學衍義亦然又陸
架金臺紀聞云元時州縣皆有學田以供師生廩餼餘租
悉用刻書故警校字畫頗有精者皆書院山長主之故也

元史類編卷之三十五終

悉取校書館醫好字書賦百辭皆音非
 與金空開云云執世淵皆音非
 中隱心又空也並奇其善以具落和以之之意未詳至盈之賦也或陳氏大學亦兼亦然又碧
 日賦繼之錄賦賦天祖師為常世世醫醫其地地圖書道宿也問集其凡賦日以引其延問
 雖其與世成非宋姑宮刺刺惠南藥官宮二語皆景韻詩
 賦對人言上措相善姑宮靈經一卷云丹方內賦賦賦
 賦一知其美為賦字董蘭亦工荷昔金自賦草草藥得得賦賦東風賦賦其賦字并出爾賦
 賦此即知難於對卿字昔金為藥八卷題詩賦字美出華亦奇賦賦不以南來野谷賦賦其若去賦

自傳刻蓮既文傳夫豈非宜

田曰醫以識出入于更賦示非心前可取平命既辭迴既開

東垣取善善始又善賦賦宜只命兼四卷一各辭賦賦要對人賦賦何問隱云素祖并善益
 云素善始古良限人魚金和皆醫文正官賦心也每未集對人賦賦賦賦賦賦賦賦賦賦

何某也 採藥東垣十善至今人既未本為一升需醫云

正卷獲林歷各和去代出對寒六絲之限善此事獲賦一卷又配

即素問難經本草和病又難賦式命善醫學經則其卷蘭靈賦

補益云景刻八種食榮辨首領不日善獲濕筋與胃筋各三卷註

元史類編卷之三十一

仁和邵遠平戒山學南沙席世臣鄧容民校刊

文翰二 補遺

黃超然 附陳應潤

王埜翁 附謝仲直錢義方

丁易東 附陶元幹

王申子

任士

林 附趙采徐之祥

邱富國 附鄭儀孫

雷思齊

保八

吳鄰

劉整 附陳宏

朱知常

劉霖

朱隱老

周鼎

楊璩

劉瑾

朱倬

馬道貫

周聞孫

俞元燮

邵光祖

黃景昌

俞臯

魯震

劉彭壽 又淵

黃清老

鍾律

熊復

曹元博

單庚金

吳儀

毛應龍

戴良齊

史季敷 附趙有桂

雷光

霆

陳深

程龍 附程直方

程煥

吳迂

聞人夢吉

陳剛

陳樵 附石一鰲

牟楷

馮翼翁 附彭絲

潘迪

薛元

程時登

林起宗 附程復心

陳普 附韓性同

史伯璿 附詹道傳

景星

曾貫 上經學

陰幼遇 兄幼達 劉辰翁 子尚友 史蒙卿 宋无 白珽 劉應

龜 元淮 袁易 徐鈞 胡助 姚應鳳 謝暉

方道齡 吾衍 仇遠 呂徽之 薩天錫 周權

王景賢 朱文憲 陳泰 于欽 王炎午 楊士宏

吳正道 史公珽 陳大倫 李康 黃玠 迺賢

丁鶴年 楊少愚 附陳清隱 沙刺班 王立中 何失 翟炳

附王鼎賈竹 程以臨 王逢 王元杰 黃庚 蒲道源 謝宗

可 岑安卿 洪希文 孟昉 劉友益 趙居信

鄭元祐 胡天游 周霆震 潘音 石烈希元

郭鈺 舒頔 楊維楨 李祁 戴良 李延興

張憲 周之翰 李存 甘復 顧德輝 張樞

善 附陸居仁 張昱 陶宗儀 上文學下附藝學

黃超然字立道天台人幼有高志嘗往來王栢門下得聞性理之旨尤深於易恨朱子本義欲再修而未及乃參會互考采之先儒以盡其變本之經義以斂其歸作周易通義二十卷又以讀易之法當先推卦義以求六爻之情情有難通則參以象象有難通則參以位位有難通則參以三百八十四爻之例別爲發例三卷或問釋蒙各五卷兩與鄉貢宋亡遂不仕築西清道院居之世祖嘉其節賜諡康敏 同邑陳應潤字澤雲父獻肅公邦彥湛精理學易有家傳應潤作周易爻變義蘊四卷甚言假老子之學者創無極太極之論變爐火之術者撰先天後天之圖強指陰陽老少爲四象而四象之說不明妄引復姤逆順爲八卦而八卦之位不定乃示人爻變之法削去其圖辨正其說自謂積三十年勤苦而成至治二年黃潛序而行之

王楚翁字太古婺源州人宋遺民性嗜易辟鎮江學正謂此職十年亦不得至卿相棄官歸著見易篇極卦畫之所以然而皆本河圖洛書自然之法象既卽圖書詳論人所以取則而畫卦作範之故復改正洛書已兆於神禹以前且援列禦寇子華子乾鑿度與黃庭經之辭以證劉長民九爲圖之說復辨孔安國劉向父子班固僞關氏易相承立說之非又有周易分注主於明象以考變有司具錄進呈時尚程朱易說皆駭所聞見吳澂方爲甞監師見而說之所注易纂言多采其說上饒謝仲直著易三圖十卷以先天八卦圓圖爲河圖九數而九位方圖爲洛書十數而五位作五位相得之圖虞集見而善之吳興進士錢義方作周易圖說謂河圖本伏羲所取至洛書之出在千有餘年後聖人並陳之不過以龍龜負文而出河洛者其事同聖人則之而卽理推數二者固

可相通故並舉之以見義非謂作易兼取洛書也故其說悉本河圖而不及洛書云

丁易東字石潭龍陽人宋進士官編修入元數徵不起著周易傳疏十卷易上下經古既爲二卷通孔子所傳十篇爲十二卷至費直分彖象二傳附於經詞後以便學者今乾卦是也後人又附爻象傳文於當爻之下今坤卦以下是也呂微仲嘗正之爲十二篇晁以道又正之爲八篇皆以經彖傳文言繫辭說卦序卦雜卦爲次呂伯恭又更著爲經二卷傳十卷合王肅本朱子本義用之吳斗南又謂說卦三篇漢初出於河南女子今止存其一又有繫辭上下二篇卽所謂說卦上中篇而今所傳說卦特下篇也乃合夫子彖大象各爲一卷而以小象分上下爲繫辭傳以今繫辭合說卦爲說卦三篇南康馮氏謂其說近是然彖象依本義分爲二故

上下二經外十翼之序彖上一象下二象上三象下四文言五說卦上六說卦中七說卦下八序卦九雜卦十其說固似有理但改繫辭爲說卦尚有可疑而寘文言於繫辭前則不可易東從其序而繫辭傳之名則仍依本義考訂尤確嘗建石潭精舍教生徒事聞賜額沅陽書院授以山長時襄陽陶元幹亦嘗著易世稱陶易

王申子字巽卿邛州人寓居慈利天門山著大易緝說十卷嘗見魏鶴山答蔣得之書及史學齋臨汝講義皆祖張觀物語以九其圖者見後天八卦之象十其書者具洪範五行之數謂晦庵不及見是書故爲十圖而九書此讀易者一大疑事申子力探其原而正之取十其圖者分緯之以盡先天九其書者錯綜之以位後天不假穿鑿直可斷千古疑案皇慶二年徵爲南陽書院山長尚有

春秋類傳周禮正義等作

任士林字叔實，縣竹人，僑居奉化，講道會稽，嘗作《中易》分爲上下篇。三陳其卦，所以極河洛之數，成大衍之用，體天地之撰，盛德大業，顯仁藏用，一本坎離，顧大小過之妙，既未濟隨蠱之機，井噬嗑賁困之感，屯鼎革蒙之推，聖人通變立言之旨，粲然甚明。修齊治平之道，不出乎是。至大初薦授安定書院山長。有潼川趙采字德亮，著《周易折衷》三十三卷，以程朱傳義爲主，而附以己見，間採先儒象數變互以相發明。饒州徐之祥，號方塘，有《讀易蠡測》其言象數，取皇極於康節，取太極於濂溪，而諸卦之中多詳其變，又名《玩易詳說》。桐廬魏新之，字德夫，宋咸淳進士，亦著《學易蠡測》。因先儒列卦爲方圓圖，乃以己意成三隅圖，曲盡妙理。休寧吳霞舉，號默室，著《周易管見》六十卷，《筮易》七卷，《太元潛虛圖》十卷，雖

互有異同皆盛行於世

邱富國字行可建安人受業朱氏之門宋亡不仕著周易輯解十卷學易說約五篇經世遺書三卷其徒鄭儀孫號翠屏咸淳初應賢良舉作易圖說解大學中庸章句

雷思齊字齊賢臨川人宋亡獨居空山中著易圖筮通變義若干卷中年去儒服爲黃冠師人稱空山先生其易圖通變五卷世有傳本易筮通變三卷載道藏中作詩豪健有奇氣

保八字公孟號普庵蒙古人少好學爲黃州路總管精易理著易源奧義一卷周易原旨六卷仁宗在東宮保八嘗進箋曰自龍圖之畫既出而象數之學肇開至六十四卦以成書爲百千萬年之明鑑義文孔子發先天之妙京費王弼廣後世之傳豈但求語下之筌蹄又當參胸中之關鍵凡蠡測管窺以探精義皆銖積月累

以用深功苟得其真敢私其秘不揆淺膚之素學冒干投進於青宮冀虎闈齒胄之間特加披閱在鶴禁延儒之頃更賜表章太子深爲嘉納尚有周易尚占二卷今佚

吳聚字

永新人宋末避讐徙山西變姓名張應珍注周易宗

程朱而不爲苟同如參天兩地而倚數鄴謂本義天圓地方圓者一而圍三三各一奇方者二而圍四四合二偶似費擬議蓋五生數中天數一三五凡參地數二四凡兩故聖人參兩之以倚數八卦之象乾坤天地以太虛言也震巽天地之長男女爲雷風有氣無形坎離天地之中男女爲水火有形無質艮兌天地之少男女爲山澤有質確定矣駙馬濶里吉思嘗從之質疑刻其書於平陽路大德八年官秘書少監始更今名

劉整字宋舉古田人自稱蒙谷遺老敎生徒百餘人少從合沙鄭

少禎望易傳六十四卦圖說及春秋元經著易纂圖一卷甫就而卒 同邑有陳宏者元初徙華亭同知吳江州事著易童子問易象發揮各一卷葉氏菘竹堂書目嘗載之

朱知常字久道隱居金華赤松山通儒術稱黃冠師少受易於鄉先生盧端叔後得易說於池陽周元舉遂以見聞集爲一編進上名經進易解更有重氏易傳覺李氏易辨證齊博士易解皆不傳惟尤氏遂初堂書目載之

高氏書目有溪邊熊棟字季隆著易說數卷

劉霖字雨蒼安福人博通五經元季寇陷城邑乃避地泰和學者師尊之性耿介不隨世俯仰有太極圖解易本義童子說四書纂釋杜詩類註等彙時泰和陳謨號心吾其學亦爲鄉郡所宗著書經會通詩經演疏二書及海桑集

朱隱老字子方豐城人受業桂莊涂應雷遠承朱子遺緒倡道荷

山之陽精易理及邵子先天橫渠正蒙諸書謂先天之學心學也其圖皆從中起邵子探是圖著皇極經世性命物理之說重明斯世學者畏其難棄而弗講乃作經世書說張子正蒙實與太極圖通書西銘並傳而未有爲之註者乃作正蒙書說禮經殘缺已久朱子雖定爲儀禮經傳而其輯錄皆出門人予奪多有未當乃作禮說易之爲言廣大悉備伊洛諸儒雖嘗論著其義皆愈索而愈無窮乃作易說學者稱潛峯先生

周鼎字仲恒廬陵人早從湜溪郭正表游六經有所疑滯縱橫叩擊多超特之見謂詩分正變固肇於漢儒然正中有變變中有正其體製音節實然不侔若虛心玩之策書紊亂瞭然可見必各從其類然後可辨世道升降之由其詩雖非盛時之作其人旣賢其詞猶爲近古必附小大雅之正者勸懲之義庶幾有托鼎於六經

皆有論著獨詩經辨正爲完書

楊璲字元度餘姚州人起家儒生著詩傳名物類考御史姚轍上

於朝歷寧海縉雲及本州學官同郡夏泰亨字叔通九歲能文

早領鄉薦官翰林編修著詩經音考矩軒集

劉瑾字公瑾安城人博洽經史著詩傳通釋二十卷采錄各經傳

及諸儒所發要義考求世次源流至明且備明永樂中胡廣等攘

其書爲大全惟將原本愚按二字更作安城劉氏云

朱倬字孟章江西新城人至正二年進士建昌志作至順元年者誤授知遂安縣事

饒徽盜起陷城吏卒逃散倬大書座右有生爲元臣死爲元鬼之

語盜焚廨字急倬乃朝服赴水死嘗著詩經疑問七卷朱氏授經圖焦氏經籍志皆作

卷六署其篇首曰盱黎進士朱倬橐

馬道貫字德珍金華人弱冠師事許謙得濂洛之學謙沒制服盡

禮如親喪學者稱之著尚書疏義六卷自號一得叟性恬退非公事不入城市謙及門甚多而惟道貫爲著

周聞孫字以立吉水人由鄉貢薦入史館修宋遼金三史同事多遼金故臣後不肯以正統予宋聞孫疏爭之不報棄職歸著尚書一覽河圖洛書序說詩學舟楫各若干卷

俞元燮字邦亮其先自建寧徙長洲通蔡氏傳博采羣說著尚書集傳十卷或問二卷其歿也虞集爲之銘

邵光祖字宏道從父宦遊來吳因家焉博通好古研精經傳窮六書之旨張士誠辟爲湖州學正不赴著尚書集義六卷

黃景昌字明遠浦江人通尚書春秋之旨嘗言自公穀口說相傳至漢然後著之竹帛故經有脫編有錯簡學者上畏聖經下避賢傳訛舛誣漏莫之敢較其春秋公穀舉傳論及三代用正日夜食

之辨凜凜不可屈後得巴川陽恪春秋考正一卷言三代悉用夏時不改月數景昌明其不然作周正如傳考二卷謂周改月并改時左傳去夫子時近當如傳所云也

俞臯字心遠新安人幼師宋進士趙良鈞得春秋大旨自晉杜氏注左傳始有凡例之說取經之事同辭同者計其數凡若干而不考其義唐陸氏學於啖趙作纂例一書雖分晰詳備亦未嘗以義言之逮程子爲傳始分別義例臯一遵程說以義同事同辭同者定爲例十六條其有義不同而辭同事同而辭不同者則分見各事之下名春秋斷義泰定三年書成

魯震字樵南廬陵人時設科以春秋胡傳與三傳並用學者困於繙閱未有能合爲一書者震次第集之始左氏次公次穀次胡氏而取止齋陳氏說附於後凡胡氏有所引用皆分注其下別爲類

編以附於卷名春秋五傳深有便於學者

劉彭壽字壽翁辟衡山教諭樂士習之美遂家焉父淵字學海以春秋三領全蜀鄉解仕永州學正彭壽得其家傳亦以是經成進士著春秋正經句釋及春秋澤存皆衍父書而作

黃清老字子肅邵武人天資英敏五歲日記數千言泰定中成進士由編修出爲湖廣儒學提舉時人重其學行號樵水先生著春秋經旨四書一貫數十卷詩名樵川集

鍾律字伯紀汴人元末鄉貢士屢辟召不應世之學春秋者多泥於胡傳褒貶之說有能脫去宿習一以經文爲正者於筆削精義往往或昧律采諸家格言之合經者備載各條之下而間附己意名春秋案斷補遺蓋取程子傳爲案而經爲斷者

熊復字庶可南昌人以五經教授鄉里學者稱西雨先生著春秋

會傳

一作成紀

吳澂見而憚焉跋其後曰邵子曰聖人之經渾然無迹

如天道焉故春秋書實事而善惡形乎其中世之學者率謂聖人有意褒貶三傳去聖人未遠已失經意况後之注釋者乎唐儒惟啖趙二家獨究聖人之旨宋清江劉原父其次也熊君所輯會傳合之諸家注釋未有能精擇審取如此者

曹元博以字行上海人潛德弗仕著左傳序事本末楊維禎避居淞上善其書序畧曰左丘明受經仲尼故作春秋傳為聖經之案後之傳左氏者有鐸椒作鈔撮八卷虞卿作鈔撮九卷惜其文無傳漢張蒼賈誼復傳左氏河間王進於武帝至成帝時劉歆校秘書見而存之始立左氏春秋逮晉杜預復表章之而傳有注釋後世言春秋者舍左氏無以為統緒故止齋陳氏謂著其所不書以見經之所書者皆左氏功此章指所由作也元博既按經以證傳

復索傳以合經爲左氏序事本末可謂採蒐之精而權衡之審矣
不亦可傳也乎

歸庚金字君範山陰人隱晦溪山三十年日夜取古聖賢經傳遺
言洗濯磨治其書已脫稿者有春秋三傳集說分紀五十卷用呂
氏程氏所纂自左氏公穀以來諸家之同異定於一書後學得以
依據又推解正經題爲春秋傳說集畧十二卷戴表元嘗爲之序
同郡俞漢字仲雲撰春秋傳三十卷進呈詔付禮部刊版辟爲
儒學官不就門人私諡曰文惠

吳儀字明善金谿人初舉於鄉會世亂卽絕意仕宦學以六經爲
歸晚尤專心春秋謂聖人之經一而諸家異傳大道榛塞職此之
由乃著三書曰裨傳曰類編曰五傳論辨辭義嚴密每撫卷嘆曰
此書吾積學所致後有楊子雲其將好之矣

毛應龍字介石南昌人大德間爲灋州教授著周禮集傳二十四卷周官或問五卷總諸儒訓釋而斷以己意者

戴良齊字彥肅台州人精通六經奧義謂當今經書雖皆完具而禮經獨爲殘闕加以漢儒諸說多有不純著禮辨一書特出已見攷證獨爲明確吳澂常師之以衍其說

史季敷以字行明州人世傳夏小正爲夏書在大戴禮中傳之者戴氏也鄭康成爲之注或曰盧辨注謂爲鄭氏者非也山陰傅崧卿加以訓釋多所補正朱子集儀禮尊信小正而用之其論益定季敷參攷同異作夏小正經傳考三卷參以傅氏本及采儀禮集解附以釋音復取先儒解經所引小正語及事相附近者綴於傳文下脫衍者列敘於後尤稱詳密時括蒼趙有桂字詵仲有夏小正集解蓋取諸家說而更爲之解者

雷光震字友光江西寧州人居教授學士程鉅夫詹天遊皆其徒也註九經集義五十卷史辨三十卷詩義指南十七卷至元間遣使徵之未至而卒學者稱龍光先生

陳深字子微號清全世居平江宋亡即謝去舉業沈潛問學著讀

易編讀詩編及讀春秋編十二卷原本左胡采撫羣說與人高譚

遺經疊疊不倦為一時耆宿天歷間奎章閣臣以能書薦匿不出

所著詩文名寧極齋稿書史會要云草書步驟急就

程龍字舜俞號苟軒又曰不翁婺源人景定進士元初拘刷宋故官龍

不得已出知永嘉縣著尚書毛詩二傳釋疑禮記春秋辨證及弄

環餘說補程子三分易圖並刊行世同邑程直方字道大通諸

經生平著述易則有啟蒙翼傳四聖一心書則有蔡傳辨疑詩則

有學詩筆記春秋則有諸傳考正旁通等書

程煥字時可豐城人宋末兩與鄉漕薦入元不仕學者稱壻山先生著易傳宗書傳通詩傳微各數十卷

吳迂字仲迂浮梁州人少從饒雙峯學人稱可堂先生汪克寬其門人也著易學啟蒙書編大旨左傳義例詩傳衆說等書

聞人夢吉字應之金華人父詵老嘗遊王栢之門夢吉受學家庭父子自相師友手抄七經傳疏深究義理閉戶逾十年悉通奧旨乃開門講學泰定間貢授泉州教諭平生信道旣得涵養益純識與不識莫不稱爲有道君子門人謚曰凝熙先生

陳剛字公潛浙之平陽人受業胡長孺之門晝夜研索通易詩書三經旨要著五經問難四書通辨述歷代正閏圖說渾天儀說歷代官制說禹貢洪範手抄累試不售後兩目俱盲人有求其文者猶能口授雅正高古人稱潛齋先生

陳樵字君采東陽人父取青從鄉先生石一鰲遊與聞考亭之學

一鰲字晉卿宋鄉貢士晚年覃思於易兩日盡著周易互言總論十卷樵承家傳繼受易詩書春秋與陳直方書

無不讀讀無不解屏却傳注獨取遺經精思四十年恍然有得著

易象數解新說洪範傳經解四書本旨孝經新說常製鹿皮為衣

種藥園谷中自稱鹿皮子集

牟楷字仲裴號九溪黃巖人刻志誠正之學論文務以性命為先

詞華為後有九書辨疑致中和議河圖洛書說春秋建正辨深衣

刊誤定武成錯簡管仲子糾辨桐葉封弟辨四書疑義篇門人名

其書為理窟尊之曰靜正先生

馮翼翁字子羽永新人舉進士試科斗賦有名官至撫州守著春

秋集解大義性理羣書通鑑小錄考索類要正統五德類編文章

旨要五子旨要禮考正古書正偽錄等書 同郡彭絲字曾叔著

庖易春秋辨疑禮記集說四十九卷黃鐘律說八篇

潘迪字牖民元城人博學能文歷官國子司業著易春秋庸學述解六經發明及石鼓文音訓攷北方學者爭奉爲師表

薛元字微之華陰人制行立言傑然當世搢紳尊之曰庸齋先生曰與辛愿姚樞講貫古學有中庸注聖賢心學編易解皇極經世

圖說

困學齋集云庸齋先生講微之或者以字行乎

程時登字登庸樂平人時德興槃澗董銖得考亭之學傳其鄉里有程正則者私淑之時登從之遊深徹性命奧義著大學本末圖說中庸中和說集朱子論述問答之語審未發已發之幾而探索性情體用之極太極圖通書西銘則錯綜爲之互解更有周易啟蒙輯錄律呂新書贅述臣鑑圖文章原委等刻

林起宗字伯始內邱人幼力學長從劉因遊得周邵程朱精義著

志學指南圖為求道之標準心學淵源圖為八聖之極功及大學
論語孟子中庸諸圖孝經圖解小學題辭發明魯庵家說共數十
卷實繼北方儒學之緒時婺源程復心字子見自幼潛心理學
會輔氏黃氏之說折衷成章名四書章圖總要二十二卷皇慶二
年江浙省臣上其書優詔擢用辭不出

陳普字尚德

後以字號
更號柳崖齋

寧德人其學以四書五經為本三辟閩省教

授不起著四書句解鈐鍵學庸指要孟子纂圖周易解注尚書補
微凡數百卷尊聞紹言屹然為朱門嫡派隱居石堂山學者稱石
堂先生其門人韓性同號古遺素稱高弟有書經講義五百餘篇
易經旁注書集解史類纂等稿

史伯璿字文璣平陽人幼強記精究四書深得朱子本義時饒氏
輯講許氏藁說胡氏通旨陳氏發明有與朱子背馳者乃著四書

管窺五卷多所辨正刻版永嘉郡學臨川詹道傳亦言四書之

旨晦蝕於訓詁幸朱傳出而大義曉然讀者未易窺測乃用許衡

所定句讀著四書纂箋二十六卷鋟之建陽郡

景星號訥庵餘姚州人幼失學年十六始出就伯父黃先生學先生

本姓景繼黃氏黃曰汝欲為學必先熟讀四書而後他經可讀於是書

誦夜思者四年粗通大義後欲習舉業黃又引之受經勾乘楊淵

淵字澄源一時師友講習益知蘊奧因折衷羣言注四書集說啟蒙大

學當時已刊行中庸近得抄本餘皆不傳

曾貫字傳道泰和人少時篤志聖賢之學倜儻有大志至正中為

紹興路照磨監州慕其節槩辟禦龍泉寇倉卒間受命戰于觀背

死之有四書類辨周易變通庸學標旨諸刻

冊曰窮經致用乃為世利河清難逢作者是寄諸公殫心發

明道義嘉惠後生功有可紀

史蒙卿字景正明州人宋咸淳進士志行高卓時四明之學悉祖

陸氏而宗楊袁慈湖先生楊簡
潔齋先生袁燾及沈煥舒璘繼起復立其說有能表章

朱子之學者自蒙卿始初教授江陰著小學紺珠以淑後進其文

曰靜清集按小學紺珠本宋王應麟所著
志稱蒙卿有此書惜未得見

陰幼遇字時夫奉新人登宋寶祐九經科宋亡不仕著韻府羣玉

二十卷以事繫韻以韻摘事經史子集蒐獵靡遺垂三十載而成

兄幼達為之隨字註釋以備觀覽延祐初鉞梓盛行于世據南昌志
亦載如此

按本書則為陰時夫字劬弦所輯其兄中夫字
復春為之註其父號竹壘倦翁則宋進士也

劉辰翁字會孟廬陵人補宋太學生廷試因言濟邸無後可慟忠

良戕害可傷風節不競可憾忤賈似道意置丙第遭亂隱居求道

著須溪文集子尚友克世其家吳澂評其父子之文謂辰翁奇詭

變化尚友浩瀚演迤皆能成一家言

宋无字子虛舊字晞顏壯歲負氣視功名如拾芥宋末兵起自晉陵遷吳冒朱姓雖奔走搶攘學業不怠父國珍仕元領征東萬戶案牘適病痿无句以身代入海抵竹島風雹交作隨驚濤上下未嘗廢吟咏至元二十四年中丞王西溪舉茂才以奉親辭著翠寒集詩趙孟頫稱其風流蘊藉皆不經人道語又吟嚙集一卷雜咏古人軼事更有鯨背吟乃從事征東幕府時作皆七言斷句議論諷刺探賾闢幽不當徒以詩目之

按趙魏公翠寒集序云子虛舊以晞顏字行則曹景孫十二代詩選別載朱晞顏鯨背吟者誤

也未知子虛曾冒朱姓本一人耳

白挺字廷玉錢塘人年十三受經太學卽有聲性耿潔甫壯授徒藏書家晝繙夜誦燈墜花穴帽不知也李衍爲江浙平章薦授太平學諭挺勉起應命秩滿遷蘭溪州判官不赴其詩文爲時所重

紫陽方回稱其冠絕古今剡源戴表元謂其注波五經之淵披條
百氏之晚廬陵劉辰翁言其蒼然者不惟極塵外趣兼有雲山韶
護之音晚歸老棲霞學者稱湛源先生所著曰經子類訓曰集翠
裘曰靜語各二十卷亦工書有魏晉風
劉應龜義烏人自少潛心義理之學每以古人自期宋咸淳間遊
太學丞相馬驥高其才將以女妻之堅不允由是名稱藉甚至元
初起爲月泉書院山長升杭州學正所著有夢稿癡稿聽雨劉稿
其二十卷

元淮字國泉別號水鏡臨川人徙家邵武初以軍功顯閩中官至
溧陽路總管嘗有詩云截髮搓繩聯斷鎧捲旗作帶繫金創臥薪
嘗膽經營了更理毛錐治溧陽溧陽爲金陵上邑至元十三年升
爲溧州繼改溧陽府已升爲路淮到省乞改作直隸州少蘇民力

及去任作詩云問歸行李輕如羽沿路吟詩有一船其廉退之風
可想見著金困吟一卷

袁易字通甫長洲人丰姿秀朗不求仕進行省使者將薦之朝謝
不可辟署石洞書院山長辭歸居吳淞具區間築堂曰靜春聚書
萬卷手自校定著靜春堂詩集四卷與郡人龔璠郭麟孫爲吳中
三君子趙孟頫嘗作臥雪圖貽以美之子泰字仲長爲郡學教授
別號寓齋亦有詩行世

徐鈞字秉國蘭谿人宋汀州使君時升之子也以父任爲濠州定
遠尉宋亡不仕家故多書發其篋盡讀之至古今興亡之變治亂
之故有慨於中則發爲詩歌通計一千五百三十首名曰史詠同
郡許謙黃潛皆爲之序

胡助字履信東陽人貌清古深究經史百氏大旨舉茂才授建康

路學錄至順間用薦改國史院編修官平生薄勢利與人無怨惡嘗作大拙小拙傳以寓意著純白類稿三十卷

姚應鳳字時和慈谿人自幼承家學卽以文字爲業頗自雄其才喜馳騁每屬筆於廣衆中詞鋒橫逸驚一座後持以謁同郡袁桷桷語之曰子文不受束縛然法度自不可廢也應鳳領之自是務爲簡嚴日益深邃至元間嘗就試省部時以龍虎臺命題有司得應鳳賦嘆曰此楚漢故物也置高第其賦爲世所傳誦有訥軒稿若干卷藏於家

謝暉字彥實資陽人識見通敏早歲受業胡長孺之門以德業自勉或勸習舉子業答曰學以博通古今資文行耳仕奚所急趙孟頫見而愛之授以書法一臨池遂得其神爲詩文簡淡雋永尤長尺牘人得其片楮爭藏弄以爲榮暉亦不自秘惜有求輒應藩帥

郡伯詣門請交未嘗造謝每相對清言終日一語不及私說者謂其貞不絕俗云

方道聲字以愚淳安人宋尚書逢辰曾孫從同里吳朝陽先生游以春秋名當世登至順二年進士授翰林編修官所撰后妃功臣諸傳筆削大義獨斷於心無能議者調杭州府判引疾歸著春秋集釋愚泉詩稿各十卷詩說文說選唐詩各一卷

吾衍字子行由太末徙家錢唐性凌物傲世故高不事之節求室委巷中教小學常數十人或請謁從樓上遙謂曰吾出有間矣著尚書要畧聽元集造元集九歌譜十二月樂譜辭重正卦氣楚史檮杌晉文春秋諸書兼通音律工篆隸初衍年四十未娶所知爲買酒家女爲妾年饑女嘗事人後夫知妾所在訟之衍遭捽辱不勝忿因詣仇遠作別值晨出留詩一章有西冷橋外斷橋邊之句

明日有得遺履於橋上者西湖多寶院僧可權從衍學知其死乃

葬衍遺文於後山

學古編作姓吾邱名衍先世本趙人

仇遠字仁近錢塘人官溧陽州教授好古博雅楷書學歐陽率更行書亦善所著有山村集批註唐百家詩選名重一時

呂徽之號六松家仙居萬竹山常逃名耕漁以自給偶攜楮幣詣

富家易穀種值大雪立門下人弗之顧徐至庭前聞閣中分韻作

雪詩有得滕字者苦吟弗就徽之不覺失笑諸貴游出見其露頂

短褐輒侮之詢其見笑之由徽之曰我意舉滕王蛺蝶事耳衆始

嘆服邀入坐以藤滕二字請足之卽援筆大書復請和曇字韻更

立就和畢便出衆疑其爲呂處士也與之穀拂然曰我豈受不義

者必易之刺船而去遣人遙識其處雪晴往訪焉惟草屋一間家

徒壁立忽米桶中坐一人乃其妻也試問呂先生何在曰溪上捕

魚始知真為徽之矣詣其處方艤舟隔岸曰諸公盍先到舍遲我乎少頃攜魚換酒至盡歡而別他日復往躡其蹤則遷居矣一日與治中陝字遇諸道字策蹇驢見徽之風神高簡問曰得非呂先生乎曰然遂握手共論驢故事徽之舉一事字答一事互至四十餘事字不能答徽之曰我尚記有某出某書傳者又三十餘事字深敬之

薩都刺字天錫別號直齋木答失蠻氏祖父以勛留鎮雲代遂為河間人弱冠成泰定中進士授應奉翰林文字擢御史於南臺以彈劾權貴左遷鎮江錄事歷准西廉訪經歷有詩名善楷書晚年寓居武林每風日晴好輒肩一杖挂瓢笠踏芒躡凡深巖邃壑人跡不到處無不窮其幽勝興至則發為詩歌所著有鴈門等集西湖十景詞至今膾炙人口

周權字衡之號此山處州人磊落負雋才持所作走京師示袁桷大異之謂其意度簡遠議論確深可預館職力薦弗就陳旅選其詩題曰周此山集歐陽元序云季世詩人宋之習近骯骯金之習尚號呼當混一之初猶或守其故習今則皆自刮剝而不爲矣此山詩簡淡和平語多奇雋揭傒斯謂詩之正如日月星辰山川草木鳥獸而其變如風雲雷雹龍騰虎躑要在盡其常通其變而已惜不得與衡之共論之

王景賢號愚谷海康人少領鄉薦爲邕州路教授歷慶路天河二縣尹學博行修著作超逸文宗出居海南得所爲詩嘉其清雋手書愚谷二大字賜之及卽位更賜以六花宮袍

陳泰字志同茶陵州人延祐初與歐陽元同舉於鄉以天馬賦得薦官龍泉簿生平以吟咏自怡別號所安有所安遺集一卷好作

歌行出語清婉有致居易錄云元詩中道園一流人惜其名不著

朱文憲字原道莆田人泰定中進士由甌寧縣尹至泉州路總管

致仕博學洽聞宋濂稱其文言醇而理彰著有葵山集

于欽益都人博學多聞官兵部侍郎奉命使山東周覽山川風土

參考水經地記及歷代沿革之詳著書六卷名齊乘字思容

王炎午字鼎翁安福人宋末為上舍生少年負氣節母沒廬墓左

終身不歸文天祥被執過青原炎午作生祭文遺之其辭曰嗚呼大丞相可

死矣華元跟蹤子胥脫走丞相自敘死者數矣誠有不幸則國事未定臣節未明今鞠躬盡瘁則

諸葛矣保捍闡廣則田單即墨矣倡義勇出則顏平原中包胥矣雖舉事無所成而大節亦無

媿所欠一死耳奈何再執涉月踰時就義寂寥聞者驚惜豈丞相尚欲脫去邪尚欲有所為邪昔

東南全盛不能解襄圍今以亡國一夫而欲抗天下况趙孤蹈海楚懷入關商非前月之頑周無

未獻之地南北之勢既合天人之際可知彼齊廢齊興楚亡楚復皆兩國相當之勢而兩君大臣

因無恙也今事勢無可為而臣皆為執矣臣子之於君父臨大節決大難事可為則屬意忍死以

就義必不幸則仗大節以明分故身執而勇於就義當以臬卿張巡為上李陵降矣而曰欲有為

且思劓剄以見志其言誠偽既不可知况形拘勢禁不及為者十八九丞相之不為陵不待智者

而信奈何慷慨遲回日久月積丞相不死當有死丞相者矣丞相何所俟乎以舊主尚在未忍棄

捐也李昇纂揚行密之業遺其子孫於廣陵嚴兵守之至子孫自為匹耦然猶得不死膺世宗征

淮南下詔撫安楊氏子孫景昇驚疑盡殺其族夫撫安本以為德文反為禍幾微一失可不懼哉蜀王衍既歸唐肅宗發三辰之誓全其宗族未幾信伶人景進之計得族盡誅幾微之倚伏可不畏哉夫以趙祖之遇降上天固巧於報施然建其暫處仍坐苟安舊王正坐危疑豈能中慨體而聲氣所逼猜嫌必生豈無李昇之疑或景進之計則丞相於舊王不足為情而反為害矣炎午丞相卿之職進也前成均之弟子員進而父沒退而國亡生雖媿陳東報汴之忠死不效陸機八洛之耻丞相起兵次鄉國時有少年狂子持斐牘叫軍門丞相察其憂憤而進之憐其親老而退之非僕也邪痛惟千載之事既負於前一得之愚敢默於後進薄昭之素服先元亮之挽轍願與丞相商之人不七日穀則斃自梅嶺以出縱不得留漢甌而從田橫亦當此周粟而友孤竹至父母邦而首邱焉廬陵盛矣科目尊矣宰相忠烈合為一傳矣舊王為老死於降邸而宋亡而趙不絕矣不然或拘囚而不死或秋暑冬寒五日不汗瓜蒂噴鼻死溺死畏死排牆死盜賊毒蛇猛虎死墮一死於鴻毛駘一簣於泰山而或遺舊王憂縱不斷趙盾之弒君亦將悔伯仁之由我及張則鑄錯已無鐵噬臍寧有口乎嗚呼四忠一節待公而六為位其間問計則哭嗚呼傷哉

千載持天祥齒髮歸炎午大慟復為文祭之著五豆稿梅邊集樓

集云廬陵王幼孫字季雅當文丞相被執時謁于驛舍出牛祭文一章期以必死著易通一卷

楊士宏字伯謙襄陽人好古學嘗選唐詩一千三百四十首分為

始音正音遺響總名曰唐音其自著有鑿池春草集與豫章萬白

大梁辛敬秣陵周貞鄭大同皆以詩名聲相埒

吳正道餘干人深通六經兼明字學能補許慎說文所不足吳澂

嘗問曰模楷二字假借乎曰取義也淮南子草木譜云模本生周公冢其色正楷本生孔子冢枝葉質直若正與直可爲法則況在聖人冢乎激大敬之有六書原六書通正六書淵源圖字偏旁辨誤有古韻譜諸書激爲之序

史公珽字摺叟明州人精易理作文有典則同里鄭奕夫以道學文章自命每有論議必俟公珽鑑定然後出橐隱居數十年助教程端學薦主甬東書院遂棄去遊西州寄興吟咏自號蓬廬處士有蓬廬稿易演義及象數發揮若干卷

陳大倫字彥理諸暨州人始學於從兄洙後事吳萊絕意仕進元季避兵流于里作晚香亭日與賓客暢飲高歌舉座絕倒嘗語人曰吾平生無他嗜唯攻文成癖孳孳矻矻垂四十年昔之人如此者何限今安在哉每搔首自傷識者亦共傷之所著有春秋手鏡

尚雅集

李康字寧之桐廬人事母篤孝人稱李孝子工詩文旁及書畫琴奕無不冠絕一時至正二年郡守馬九臯遣使幣聘不起九年張奉使高其行又起之復辭及行省宰臣至邑命邑令造請議事康不得已往極談當時得失欲官之以母老辭有杜詩補遺桐川詩派梅月齋永言看山清暇集各若干卷

黃玠字伯成定海人幼勵志操博洽無不通隱居教授孝養二親遠近聞其名爭迎致之晚年樂吳興山水之勝卜築弁山自號弁山小隱有知非稿纂韻錄唐詩選行世

廼賢字易之本葛邏祿氏漢姓爲馬世居金山之西後散處內地隨兄塏海仲良宦江浙遂家明州生平不喜祿仕獨長於歌詩不規規雕刻而溫柔敦厚有風人之致每一篇出士大夫輒傳誦之

時浙人韓與玉能書王子充善古文人目爲江南三絕至正間用
薦爲編修官有金臺集海雲清嘯集行世

丁鶴年以字行其先西域人父職馬祿丁徙居武昌因以丁爲氏
年十七通詩書禮言經至正間淮兵渡江襲武昌鶴年奉母行備
歷艱阻聞從兄吉雅謨丁爲定海令徒步往依焉省臺交薦凡九
上皆不就旣而方國珍據浙東鶴年深匿海島賣藥以自給凡憂
君愛國之念皆發之詩歌著有海巢集

沙刺班字敬臣號山齋畏吾人順帝之師也爲學士時常侍左右
一日體少倦偃臥便殿側因而就寐帝以藉坐方褥親扶其首枕
之嘗患癩額上帝於金鉢中取佛手膏躬與之貼其隆重無比能
詩文兼工大字每與張翥論文翥多見屈服

楊少愚青陽人少好學博通羣書著孝經衍孝編秋浦集九華外

史各數卷同邑陳清隱與之齊名數舉不第汗漫江湖間嘗集杜

甫詩句為鳳髓集又有九華詩集

山堂肆考作陳巖清隱其字也

王立中其先自京兆徙閩州博學善詩文由慈谿縣尉遷松江知

府有廉聲所著有息庵寓齋樞隱二集

何失昌平人負才氣能詩文至正間名公交薦以親老不就揭傒

斯雅重其人贈以句曰心事巢由上文章陶阮間虞集見其所作

嘆曰當序而傳之使後之作者亦知世有斯人

翟炳字欽夫林州人詩效樂天體尤善楷書遒勁可法同邑王鼎

字大鼎賈竹字彥清皆工翰墨能詩隱居不出時稱林慮三隱人

罕覩其面者故其著作多不傳

程以臨字至可江西寧州人後至元間除將仕郎辭不就天資超

悟尤長於詩構別墅閉戶著書老而彌篤選編漢魏唐宋諸詩名

曰刪後正音其自著有瓢丸小集

王原杰字子英吳江人至正間領鄉舉值軍興不樂仕著春秋讞義十二卷其文曰貞白英華集詩曰水雲清泉集

王逢字原吉江陰州人才氣爽俠以能詩名於時至正中作河清頌臺臣薦之稱疾辭晚年避亂上海之烏涇築草堂以居自號最閒園丁又稱席帽山人有梧溪詩集七卷記載宋元之際人才國事多史家所未備

黃庚字星甫天台人嘗入詩社試枕易題推第一所著有月屋漫稿其自序曰僕齟齬時習舉子業不暇爲詩自科目廢始得脫屣場屋放浪湖海凡平生豪邁之氣盡發而爲詩若醢雞之出甕天坎蛙之出蹠涔而遊江湖也其風致清遠用意推敲不媿騷壇領袖

袖

蒲道源字得之號順齋世居眉州之青神幼強記過人究心濂洛之學嘗爲郡學正罷歸晚以遺逸徵入翰林改國子博士歲餘引去起提舉陝西儒學不就優游林泉病弗御醫藥飲酒賦詩而逝仲子機爲秘書少監哀其遺文曰閔居叢橐二十六卷黃潛爲之序稱其以性理之學施爲臺閣之文光輝自不可揜

陵川集云延祐五年道源爲編修官

言郝經續漢書黜曹魏而使昭烈上繫漢統扶植綱常有裨世道卽詔道源監刻行世

謝宗可金陵人有咏物詩百篇傳於世皆婉秀有思致汪澤民題其卷謂綺靡而不傷於華平淡而不流於俗

岑安卿字靜能餘姚人所居近栲栳峯號栲栳山人與李季和危太樸相善嘗作三哀詩弔宋遺民之在里中者寄託深遠其昆季多以科名顯而靜能獨淪落不偶然兵火之餘顯達多不傳而栲栳山人集遺詩尚有膾炙人口者

洪希文字汝質莆田人父德章號吾圃宋貢士初爲興化教諭會
兵亂父子同居萬山中朝晡孟飯燒芋咬菜相倡和無愠色德章
有集曰軒渠希文因自號續軒渠集又號去華山人稿皆自成一
家機軸

孟昉字天緯本西域人寓居北平至正中由翰林待制官南臺御
史工書法有孟待制文集多歌曲精究聲韻之學

劉友益字樂三永新人宋亡卜築萬山間杜門不與世接著通鑑
綱目書法五十九卷研精覃思歷三十年而後成揭傒斯稱之曰
百世而下先生此心先生不作山高水濶

趙居信字季明許州人少穎敏過人英宗至治三年丞相拜住薦
其爲碩德老儒徵拜翰林學士承旨所著有經說史評蜀漢本末
理學正宗禮經葦制等書卒諡文簡

鄭元祐字明德遂昌人兒時以乳媪失手傷右臂比長能左手作楷書規矩備至自號尚左生僑居平江聲氣雲集文酒之會記序多推屬焉所著有遂昌山樵雜錄其詩曰僑吳集

胡天游名乘龍以字行別號松竹主人岳之平江人本文獻世家子有俊才七歲短吟具作者風力名藉一世然負高氣孤立峻視不肯一起取斗祿扼腕當時俯仰太古鳴之歌什有沈湘蹈海之概其詩名傲軒吟稿晚歲益自矜其徘徊亂世以緬想太平之心更作述志賦以寓長飲之恨云

周震震字亨遠安成人父以道篤志古學宋亡遁跡石門田西震績其世學益斂英華專意古文辭每屬文不起草而用意精刻至正中遭亂其感時觸事之作皆可爲國史補晚年自號石西子有石初集十卷謂石門吾先志不忘本也

元史列傳
卷二十一
三三
紇石烈希元本遼巨族隱居成都篤志窮經於易象春秋二書精
考密察深得先儒不傳之秘一生安貧樂道不務虛名所作詩文
甚富未嘗出以問世每閉門考擊殊有志於三代禮樂謂百年可
興大德初柳貫爲奉常特舉以自代

潘音字聲甫天台人生十歲聞崖山之變昏迷不食者累日長而
絕意進取掇野蔬以自給躬耕世田十餘畝非其力不食也築室
南洲山中扁其軒曰待清或勸之著違曰六經語孟先儒所言備
矣吾何以注脚爲居閒讀書有得往往筆之壁牖間至正三年詔
徵天下遺逸廉訪使檄贊之行固辭嘗嘆曰泉石膏肓非其時莫
可療也有待清詩遺稿及讀書錄

郭鈺字彥章吉水人壯年負盛氣爲詩清麗有法其於離亂窮愁
之作尤悽惋動人年逾六十竟以貧死其春夜寒詩序云余值時

危一窮到骨今春雨雪連旬擁牛衣以當長夜遂成疝瘡亦可哀
已所著靜思集詩文甚富

舒頔字道原績溪人年十五六與同郡程文講明經史之學後至
元中辟貴池教諭秩滿轉台州學正時艱不仕奉親攜書歸遁山
中嘗與親避寇巖谷被執頔止絕叱賊賊感而釋之其詩盤桓蒼
古不貴纖巧織紵之習字尤喜樸拙識者曰宗漢隸非八法也學
者稱貞素先生有華陽貞素齋集七卷

楊維禎字廉夫諸暨人泰定初進士署天台尹罷去張士誠據浙
西累使求致不能屈且撰五論反復告以順逆成敗之說識者遽
之生平氣度高曠喜戴華陽巾披羽衣周遊山水間以聲樂自隨
早歲屏居吳山鐵冶嶺築萬卷樓輓轡傳食讀書其上者五年故
以鐵崖自號已得鐵笛於湘江吹之亦號鐵笛子文辭非秦漢弗

之學久與俱化晚年築蓬臺于松江東南才俊士投贄求文者無
虛日當疾急撰歸全堂記頃刻立就擲筆而逝著有四書一貫錄
五經鑰鍵春秋透天關禮經約歷代史鉞二百卷詩有瓊臺曲洞
庭雲間雜吟五十卷

李祁字一初茶陵州人元統初登左榜進士第一應奉翰林文字
母老就養江南改婺源州同知以母憂歸隱永新山中年七十餘
遭兵亂被傷而歿總制新安余茂刻其遺文爲雲陽先生集十卷
同榜王禮字子讓廬陵人元亡不仕日以鐵拄杖探詩山谷間著
作甚富不求聞於時故所傳絕少

戴良字叔能浦江人少事舉子業尋棄去專心博古學文於柳貫
黃潛學詩於余闕皆得其師承至正中以薦授江北儒學提舉而
浙東已陷乃避地吳中久之挈家泛東海渡黑水憇登萊求間行

歸值道梗不得達僑寓昌樂數載訪求齊魯間豪傑奮欲有爲而卒無所遇晚年南還變姓名隱九靈山下有九靈山人集三十卷

一統志云有春秋金華正學編載夏正辨謂周經傳考和陶詩時月俱不改宏經據史最確

李延興字繼本先世本中州元初占籍北平父士瞻爲翰林學士承旨延興少負詩名成至正丁酉進士授太常奉禮兼翰林檢討中原傲擾隱居不仕河朔學者多從之以師道尊於北方有一山

文集

王冕字元章號煮石山農諸暨田家子也年八歲父命牧牛隴上竊入學舍聽諸生誦書聽已輒默記暮歸忘牛父撻之已復如故安陽韓性聞而異之因錄爲弟子通春秋諸傳一試不第卽焚所爲文常着高簷帽披綠篔簹衣履長齒木屐或騎黃牛持漢書朗誦人皆目爲狂北遊燕有欲薦以官職者冕曰不滿十年此中孤兔

遊矣何以祿爲卽遁歸隱九里山結茅三間自題爲梅花屋嘗傲

周禮著書一卷坐臥自隨賦詩千百言立就善畫梅自書所題其

上人爭寶之

樵書云明兵攻城昇
至軍前直言而死

張憲字思廉山陰人別號玉笥生負才不羈嘗走京師創言天下
事衆駭其狂還入富春山混緇黃以自放張士誠據吳辟爲都事
吳亡變姓名走杭州旦暮手一編人不得窺死後視之其生平所
作詩也楊維禎曰吾鐵門稱能詩者南北凡百餘人求其似憲者
不能十人有玉笥集皆懷古感時之作

周之翰字申甫華亭人精易學自號易癡道人兵興隱居神山作
乾坤闔闢天地生成陰陽變化山川流峙四圖并贊以發明其蘊
奧講授鄉里晚涉老莊乾竺等書無不通貫

李存字明遠安仁人穎悟該博好爲古文誦與貴溪祝蕃遠舒元

易吳尊光同游上饒陳立大之門號西江四先生尊書室曰竹莊
決計長隱秘書李孝光舉以自代不起有竢庵集三十卷

按饒謙益列朝詩集

謂存卒于洪武中者誤也
危素所撰墓志年月甚明

甘復字克敬餘干人至正之亂張仲舉僑居雲錦山復與甘彥初
張可立往從之遊仲舉少許可獨推重三君為士林遺逸復與彥
初詩多流傳惟可立不著

顧德輝字仲瑛別名阿瑛崑山人少輕俠通賓客年三十始折節
讀書購古圖籍彝器鑑賞自隨舉茂才署會稽教諭不就卜築玉
山草堂供張亭榭之盛甲天下日與高人觴咏都為一集曰玉山
名勝又會萃其所得歌詩曰草堂雅集張士誠據吳避隱合溪母
喪歸張氏再辟辭不獲乃髡髮廬墓號金粟道人臨卒自為壙志
戒其子以紵衣桐帽櫪鞵布襪纏裹入土 同郡唐元字本初嗜

古博雅有船號一葦杭浮遊江湖日哦詩其中每過阿瑛溪上必繫舟談笑終日詩見草堂雅集

張樞字夢辰陳留人徙家華亭築室曰讀書莊與諸弟倡和爲樂兼工行楷貝瓊作傳云陳留張氏子夢辰居華亭之城東門日與弟子數十輩講春秋或勸之仕不應人以是高之稱曰林泉民年八十餘乃終

錢惟善字思復錢塘人長於毛氏詩學至正辛巳鄉試出羅剎江賦鎖院三千人皆不知羅剎江爲曲江卽錢塘江也惟善引枚乘七發爲據謂發源太末太爲主司所稱由是得名號曲江居士又自稱心白道人著有江月松風集十二卷官至副提舉張士誠據吳退隱吳江之筒川工書法其卷冊多皆傳人間者 華亭陸居仁字宅之以詩經中泰定丙寅鄉試自號雲松野褐與惟善楊維

禎遊歿同葬於山東麓號三高士墓

張昱字光弼廬陵人早游湖海爲虞集張翥所知累官杭省左右
司員外郎日以詩酒自娛超然物表後棄官歸張氏禮致不屈策
其必敗題蕉葉以寓志居西湖每放舟湖心把酒扣舷自歌其所
爲詩笑曰我死埋骨於此題曰詩人張員外墓足矣自號可閑老
人年八十三而終有左司集

陶宗儀字九成黃巖人父煜爲福建行院都事九成幼好古灑落
不凡少舉進士一不中卽棄去工文章尤刻意字學至正間浙帥
秦不華南臺御史丑閻辟舉行人校官皆不就後避兵三吳間藝
圃一區躬耕之暇每以筆墨自隨時輟耕樹陰抱膝而嘆每記一
事輒摘葉書之貯一破盎去則埋於樹根人莫能測如是者十年
餘遂累盎致數十一日盡發其藏萃而錄之合三十卷題曰南村

輟耕錄又有說郭一百卷書史會要九卷四書備遺二卷其未脫稟者不與焉

冊曰言以載道正史獨缺文人嘔心誑忍潭滅廣羅博取各以類列一代作家庶傳累葉

李旬金字仲和號竹山溧水人宋進士為無為軍節制官入元不仕工書法所撰有稽古韻及存古正字編傳於世

金應桂字一之號蓀璧錢塘人為宋縣令元初隱居風篁嶺著書垂老楷書師歐陽率更體純熟畫學李龍眠嘗作巖居上真出塵觀音刻石性高亢不肯為人下筆故傳世者絕少

龔開字聖與號翠巖淮陰人宋兩淮制置司監官入元不仕性耿介不同流俗作古隸得漢魏筆意畫山水師米人馬師曹霸描法甚麗尤喜作墨鬼鍾馗等像奇變自出一家嘗為文天祥陸秀夫

作傳時稱班固手筆

鮮于樞字伯機號困學民漁陽郡人官太常典簿面帶河朔偉氣每酒酣驚放吟詩作字奇態橫生善行草趙孟頫謂樞蚤年嘗作吏故所書間有俗氣曾見手編草韻下用小楷音釋類鍾元常殊不易得云樞嘗於廢圃得怪松一株移置屋前呼爲支離叟日夕與之相對所著詩文名困學齋集子去矜孫端皆以能書名

有邊武字伯京

吳里字處仁洪恕字士敬蔣惠號紫芝山人行草專學伯機時有亂真者

柯九思字敬仲號丹邱生天台人官奎章閣鑒書博士能詩文善楷書並畫竹木筆勢生動論者謂文與可後一人每得意輒題詩其上一時珍貴稱三絕雅好填詞有北曲十二本文宗至順三年御史臺劾其賦性矯譎挾末技以趨權門遂罷官

杜敬字行簡大梁人後寓杭與鮮于伯機趙子昂爲友善鑒古器

物有清裁好鼓琴知音律尤長於書喜蓄古名人墨跡歷代金石刻甚富大冠長裾優游吳山文酒間晚號夷門老人

周疑

一作周仲疑

蕲黃人幼端方博識古文於篆隸尤癖嗜世家大族有

古本藏書不遠千里赴之必期得見一經別白輒能指其神妙遠近碑刻藉手以爲寶重然有求書者或非聖賢理道雖百計懇卒不與儒者以是多之故所行世亦絕少

劉致字時中河東人官翰林待制風情高簡蚤負聲譽能篆有所著復古糾繆編傳世行草宗晉人而不純熟

宣昭字伯綱號良齋漢東人有雅行精通古今於天文地理陰陽術數百氏之學無不諳詣尤精翰墨正書能備八法

班惟志字彥功號恕齋大梁人初徽仁裕聖皇后以泥金寫大藏經學士鄧文原舉惟志入經局補州教授累官集賢待制早歲宗

二王筆勢翩翩不失書家法度晚年學黃華應酬塞責文宗嘗評其書謂如醉漢罵街

周馳字景遠聊城人官燕南廉訪僉事雅瞻經術嘗爲南臺御史分治過浙日與朋友周旋每有往復其書吏記之壁間以示風刺馳名謂曰人所以讀書爲士君子者正欲爲五常主張也使我今日謝絕故舊是爲御史而廢一倫寧失御史不可滅人理也善作行草婉約豐妍

周砥字履道無錫人博學工文詞正行草書運筆分布勻穩兵亂避地與義興馬治交厚往舍荆溪山中治爲治具巾車泛舟窮陽羨溪山之勝有荆南倡和集義興多富人與治善者咸置酒張樂召砥砥心惡之一日貽書別治夜半遁去歸吳中與高陽諸人游書畫益工已又去之會稽歿於兵

宋季子以字行臨川人能古隸嘗增廣宋婁機漢隸字源及撰兩
漢字統凡十二卷明州袁裒字德平嘗著書學纂要使游藝者知
所取法兩人名並一時

盛熙明其先鮮卑人後居豫章篤學多材工翰墨能通六國書至
正中嘗以所編法書考八卷進上覽之徹卷命藏中秘

甲屠澂字敬仲諸暨人謹言端行為鄉里所重性寡合望之容色
毅然至有所請則溫煦和婉辨析必盡工古文辭春容簡奧精篆
籀小楷咄咄秦晉辟本路教授辭不行晚節益堅有遺世獨立之

意所著有孝全撫言數卷

書史會要載善古篆隸者有應在字止善句章人嘗作篆
隸偏旁點畫辨 王翼字元徵號華陽生金壇人有所篆

四書

張璣字公弁保定人官集賢大學士篆書厚古 趙期頤字子奇官西臺治書侍御史工

大篆董倫字安常篆宗周左丞楊益字友直官臨江路總管其古隸學廬江太守碑俱沐人 楊
惠官南臺御史善大小二篆 湯煥號箕山瀏陽人進士及第能篆 張伯仁字至道閩人善篆

及行草書 宋璚字仲珩金華人大小二篆純熟姿媚行書亦有氣韻 王廉字熙陽括蒼人能

兼篆隸 祖子靜平江人篆師二李 吳叡字孟思錢塘人工篆隸而千古體尤精但筆墨雕刻

人以爲病同鄉吳福孫字子善官上海主簿楊燾字彥常官翰林編修楊遵字宗正李林字九臯

莫昌字景行俱善篆隸 李處巽字元讓東平人能小篆 王禮字禮仲維揚人篆宗張謙中

夾谷希顏龔觀並江右人工篆 余襄鄱陽人工篆其大字尤精 張體字孟府江陰人隸書學

李重光金錯刀法時作顛掣勢雙鉤亦純熟 趙儼字子威真定人官翰林學士余謙字巖山池

陽人官江浙儒學提舉石巖字民瞻京口人官縣尹隸書俱學韓尚書 王務道字宏本山陰人

吳志淳字主一曹南人古隸俱學孫叔敖碑 李有一名立義字仲方燕京人官兩浙鹽運司經

歷工古隸枯木竹石意尤高遠 顧祿字謹中華亭人工於分隸其行楷學蘇文忠 劉堪字子

輿橋字人歐復字伯誠鄱陽人艾斐字季成臨川人張文盛字彬之秣陵人曹壘字子學東平人

李介石字守道天台人隸書俱得古法 善真草篆隸者有陸友字友仁錢良右字翼之錢途字

伯行盧熊字公武俱平江人朱芾字孟辨陳璧字文東俱華亭人鄒偉字元偉江右人真草篆隸

悉合規矩 章弼字共辰亦華亭人未十歲即能扁勝大字及長真行草篆俱師趙魏公 善八

分書及大字者有鄭杓字子經莆田人能大字兼工八分有所著衍極行世 汪正字大雅四明

人專精八分書 牛麟字伯祥太原人大字為時稱最畫墨竹意亦蕭散 趙鳳儀字瑞卿號怡

齋官京畿都漕運使李敏中字好古官陝西行省郎中俱汴人汪從善字國良錢塘人官邵武路

總管宗椿字壽卿山左人官南臺照磨皆工大字善真行草書者曾遇字心傳華亭人官安吉主

簿至元末被選入京書泥金字藏經同鄉衛德辰字立中書學舍利塔銘從子仁近字叔剛楷書

學黃庭經曹禾字世長正書學鍾元常行草宗二王曹衡字士望才氣雋逸作真草蚤得時譽

傅若金字汝礪新喻人官廣東廉訪照磨正書學歐陽率更 詹希源字孟舉其先徽人徙居都

門正書師虞永興富有繩墨字愈大愈有神力 吳雲字友雲義興人官太子司經陳謙字伯謙

天台人滕權字用衡姑胥人正書皆宗虞永興權亦能篆 俞鎮字伯貞嘉興人官建德縣尹陳

子翬字象賢奉化人陳德永字叔夏黃巖人書法並宗李北海 夏日攸字仲善吉安進士官會

稽縣尹楷學顏魯公 王默字伯靜華亭人書學趙魏公行筆甚捷 胡益字士弓官參知政事

真草師趙魏公都下碑刻多出其手朱振字良玉草學聖敘序真師趙魏公並鄱陽人 鄭瑤章

德懋俱與魏公同時每為代筆 俞和字子申號紫芝生鄆道禮字行義皆武林人行楷並師趙

魏公 陳達字元達永嘉人官秘書少監陳睿字思可鄭炳字元炳謝肅字元功唐肅字處敬陳

字亮呂中立俱會稽人卓習之慶元人正書並師二王名著浙東先後相望 倪中字中愷信州

人古翰林待制正書端謹清潤 張瑄字藻仲江陰人行楷有法 羅元字居仁平江人從容澹

靜行楷有晉人風致 唐志大字伯剛落筆峻激畧無滯思鄧學可龔肅字法悉規模晉宋各臻

其妙並維揚人 張仲壽字希靜號疇齋錢塘人官翰林學士承旨行草宗義獻甚有典則亦工

大字同邑范居中字子正黃中字彥美皆善真草書 程君寶溧源人草書得顧素體 宋廣字

昌嶺南陽人草師懷素惜其常作十數字相連不斷非古法 胡布字子申善草書高翼字茂之

官嘉興路推官善真行草書並河南人但翼不知六書偏旁時作謬字為有識所鄙 張衡字士

衡樂陵人官中書省員外郎草書師張長史又善山水墨竹 易履字安道茶陵人葉見泰字夷

仲丹邱人鄭禧字熙之宋克字仲温俱平江人葛慶龍居越中號越臺洞主端木智字孝思江右

人並工草書 饒介字狷之鄱陽人博學有口才草書亦飄逸 楊元正吉水人官翰林檢討善

行草書其隸法師蔡邕為時所重 李章字君章東平人善書法兼畫墨竹有高致 劉楨字廷

幹官福建參政燕京人史性良字顯夫官中書平章杜從訓字義方官江陰州尹俱鄆城人段天

佑字吉甫汴人官江浙儒學提舉林鏞字叔大官江浙行省員外郎

張翼一名翥字翔南俱嘉興人徐子愚吳興人翰墨並有聲於時

李衍字仲賓薊邱人別號息齋道人博學多通官江浙行省平章

少時見人畫竹從旁窺其筆法始若可喜旋覺不類輒嘆息捨去

後從黃華子澹游學已觀華所畫墨蹟又迥然不同乃復棄去至

元初來錢塘得文同一幅欣然願慰自後一意師之兼善畫竹法

加青綠設色嘗曰墨竹畫竹皆起於唐自吳道子以來名家纔數

人王右丞妙蹟世罕其傳蕭協律雖傳昏腐莫辨黃氏神而不似
崔吳似而不神惟李頗形神兼足法度該備然文湖州最後出不
異杲日升空爍火俱息黃鐘一振瓦釜失聲矣後使交趾深入竹
鄉於竹之形色情狀辨析精到作畫竹墨竹二譜凡粘幘罽絹之
法悉備子士行字遵道官黃巖知州畫枯槎竹石得家學而過之
尤善山水

陶復初字明本別號介軒老人官台州儒學教授博綜羣書多才
菴小篆師徐張古隸師鍾梁圖繪專師李蘊邱父子作墨竹及着
色竹皆工亦能山水從子宗暹一名文昭字晉生官江浙儒學提

舉書畫並擅一時

志云復初官樂清縣尹
宗暹官秘書監典簿

王振鵬永嘉人工畫山水人物尤精界畫文宗詔繪殿壁稱旨欲
官之不受賜號孤雲居士時人重其品以幣交者履錯戶外苟非

其人未嘗輕點一筆所傳春明奪標圖與清明上河圖同價嘗奉
詔作十妃用藏之內府天台衛九鼎能得其傳

陳仲仁江右人官陽城主簿少負逸才喜翰墨爲湖州安定書院
山長日與趙孟頫論畫法孟頫多所不及後見其寫生花鳥含毫
命思追配古人嘆曰雖黃筌復生亦復爾爾

王淵字若水號澹軒錢塘人幼習丹青嘗侍趙孟頫多得指教故
落筆皆師古人無一毫院體山水師郭熙花鳥師黃筌人物師唐
人各極神品其淺墨花鳥竹石尤當代絕藝

高克恭字彥敬號房山其先西域人後居燕京官刑部尚書善畫
山水始師二米後學董源墨竹宗黃華皆有古趣怪石噴浪灘頭
水口烘瓊潑染作者鮮及一日與客遊西湖見素屏潔雅乘興寫
奇石古木數日後趙孟頫爲補叢竹虞集題詩其上此圖遂成三

絕世爭寶之錢塘周如齋學山水獨稱高第

錢選字舜舉吳興人幼有文名善人物花木翎毛師趙昌青綠山水師趙千里且善作折枝其得意者自賦詩題之小楷亦有法門人沈孟堅師其花鳥往往逼真

蘇大年字昌齡以字行真定人僑居揚州元末官翰林編修亂後避兵居吳張氏開藩特用爲參謀稱蘇學士先吳亡而卒爲詩文尚氣不喜衰颯有江海襟懷晚年自號西坡又稱林屋洞主竹石師東坡松木師廉宣仲畫家宗之

倪瓚字元鎮號雲林生無錫人詩名傳聞館閣間晚年益肆力吟咏不蹈襲前人軌轍書逼黃庭畫法八巨源之室嘗自題其畫竹云人每愛余竹余之竹聊以寫胸中逸氣耳豈復較其似與非葉之繁與疎枝之斜與直哉或塗抹久之他人視以爲麻爲蘆僕亦

不能強辨為竹生平強學好修所居清閼閣藏書數千卷皆手自
 勘定鼎彝名琴陳列左右松篁蘭菊數紆繚繞性好潔盥頰易水
 冠服振拂日以數十計見俗士避去如恐浼至正初天下無事忽
 盡鬻其家產得錢推與所知親故人皆笑之及兵興富家皆被掠
 瓚獨扁舟箬笠往來湖泖間人始服其先見有清閼閣遺稿有陳栢者被命

監鑄祭器來杭州瓚慕其名張燕湖山問餽米百石栢命從者舉豆觥引
 伎樂悉分散之瓚獨曰自在京時即熟爾名蓋以米沽之也遂絕不與交

黃公望字子久常熟人幼習神童科通百氏說旁曉諸藝酷好漢
 唐以來筆墨善畫山水師董巨源運思落筆氣韻流動晚年變其
 法自成一家山頂多巖石別出人意表後至元中江浙廉訪使徐
 琰辟為書佐以罪逃去為黃冠教授吳越間談儒墨黃老以口辯
 屈人更名堅號一峯每作一圖輒廢寢食忘應對又自稱大癡道
 人放浪江湖年八十餘卒有畫訣傳世華亭張中字子正山水師

其筆意往往神肖亦善墨戲

王蒙字叔明吳興人家住黃鶴山下故號黃鶴山樵趙孟頫甥也
能詩文不尚矩度頃刻數千言可就畫山水得外氏法秀潤可愛
亦偶作人物瀟灑大雅生平不用絹素惟於紙上寫之其得意之
筆常用數家皴法山水多至數十重樹木不下數十種徑路迂迴
烟靄微茫曲盡山林幽致後官泰安知州廳事後有樓面泰山蒙
張絹素于壁興至捉筆三年而圖成有陳汝言者夙善詩畫一日
過訪方展圖雪大作欲改爲雪景而難於設色汝言沉思良久曰
得之矣爲小弓夾粉筆張滿彈之儼如飛舞蒙遂叫絕題曰岱宗
密雪圖蒙與汝言皆不得其死

吳鎮字仲圭嘉興人性高介隱居不仕工辭翰尤善畫山水竹石
亦喜作墨花每題詩其上當時稱爲二妙有勢力者求之多不得

惟好贈貧士使取直焉晚年愛梅自稱梅花道人未歿時嘗自題其墓曰梅花和尚之塋

華光仁老性癖愛梅其方丈列植數本每花放時吟咏其下月夜見窗間疎影橫斜輒用素張之以筆規其狀凌晨視之殊有月下之思因此得其三昧標名一時著有口訣取象一丁二體三點四向五萼六枝七鬚八結九變十種諸論傳世每寫時必焚香禪定意適則一掃而成其披風帶露諸作尤為人所稱賞

圖續寶鑑載朱德潤字澤民吳郡人

官征東儒學提舉唐棣字子華吳興人官休寧縣尹劉融字伯熙薊邱人官秘書卿沈麟吳古松俱杭州人畫山水並學郭河陽其合作者神似自然老人姓劉氏遺其名祁州人工墨竹禽鳥

顧正之不知何許人善墨竹學樂善老人劉敏字有功宣德人賜號龍門居士自號年豐老人正之門人也有嵐烟夕翠圖傳世李憫字士宏號員嶠直隸河東人官集賢學士墨竹宗文湖州

史杠字柔明號橋齋道州人官行省左丞工人物山水翎毛顧安字定之官泉州路判官胡瓚字元禮官衡州路同知趙淇號太初道人又云靜華翁官湖南宣慰使作墨竹長竿勁節風致並佳宋敏支叔義崇梅間俱善花竹劉貫道字仲賢中山人工畫道釋人物鳥獸集古諸

家之長至元十六年寫裕宗御容稱旨補御衣局使冷起昂居京師工傳神至正間嘗寫御容稱旨陳鑑如居杭州為寫神第一手其子芝田能世其業王釋字思善杭州人長於小像與金陵潘桂名並一時楊說嚴畫道釋尤工寫貌宋嘉禾好為利市仙官和尚骨格態度俗工

莫及 趙清澗許擇山工人物士女 何大夫工人馬虞集詩云國朝畫手何大夫親臨伯時閱

馬圖 王仲元專門花鳥尤善繪小景 楊月澗兼畫龍虎 馬虛中好作山水 吳梅溪並工

花鳥雜技 在燕則有李士傳字仲芳山水人物學李伯時尤善摹徽廟墨戲 喬遠字達之官

翰林直學士山水學李成墨竹學王庭筠 韓紹暉字子華官御衣局使山水學武元直墨竹學

樂善老人 焦善甫工花竹人物尤喜寫生 謝佑之善作折枝傅色做趙昌 謝顯劉廣之墨

竹宗員大夫 河南有郭敏字伯達畫人物山水喜武元直師其意花竹墨竹亦臻神境官至州

倅 田衍字師孟墨竹學黃澹游 賈策字治安嘗為仁和縣尹畫花竹禽鳥得飛鳴翔集狀

山左有柴楨字君正號適齋善寫山水不習而工 信世昌字雲甫號中隱山水學沈士元有出

藍之譽墨竹別成一家蓋黃華之後又一變者 朱淳甫世業丹青工山水人物樹石寫梅竹亦

有佳致 趙元字善長山水師董源 金陵有陶鉉號菊村山水師李成 李升字子雲號紫算

生善墨竹亦能窠石平遠 吳郡有張遊字仲敏號溪雲善畫竹作鉤勒法妙絕當世山水學已

然 顧達一名達字周道工山水人物并能寫貌 謝庭芝字仲和號雪村善墨竹 陳植字叔

方布樹石甚有意趣 華亭有張遠字梅巖工山水人物潛補古畫無出其右臨摹亦能亂真 張

沈月溪以稜作為業畫山水人物學馬遠人莫能辨 曹知白字貞素號雲西山水師馮覲 張

觀字可觀世業稜作畫山水長於模倣 任仁發字子明號月山官都水庸田副使以畫馬得名

書宗李北海 錢唐有張渥字叔厚號貞明生善白描人物 孫君澤山水人物學馬遠夏珪

周密字公謹號草窓宋寶祐間為義烏令好作梅竹蘭石賦詩其上 戴淳字厚夫善畫山水

吳屋字從禮臨摹院畫咄咄逼真 曾瑞卿號禍夫山水學范寬 馮君道善寫翎毛性酷嗜鶴

鴉每被養之觀其飲啄以資筆意 溫日觀西湖瑪瑙寺僧喜畫蒲萄其枝葉髮梗皆具草書法

嘉興有盛懋字子昭畫山水人物花鳥始學陳仲美稍變其法精緻有餘 吳壻字瑩之能作

窠石墨梅學楊補之多逸趣 周堯敏字禹卿號學山風竹宗文湖州時有得意處 王鼎字德

新好寫竹學丁子卿深悟筆意予泰之號竹趣能紹父業 沈雪坡好寫梅竹 林伯英花鳥師

樓觀 吳興有張文樞字石隱幼嘗為僧山水學巨然亦善竹 徐愷字士元山水師李成 孟

玉澗姚彥卿吳庭暉畫青綠山水花鳥多極精密 浙東有王迪簡字庭吉號戩隱喜作水仙 孟

王英孫字才翁作墨竹蘭蕙雅潔不凡俱越州人姚雪心天台人作墨竹宗文湖州顧輝字

秋月江山人工道釋人物夏昶字簡伯善山水竹石趙雪巖喜作花鳥設色有法亦善墨戲

俱溫州人蜀中有劉夢良畫梅宗楊補之趙天澤字鑑淵好畫梅竹華岳善寫山水楊載

詩云華岳能詩世有名學畫丹青亦疎放霍元鎮筆意規模董北苑米南宮父子朱裕字敏

道李冲字用之畫法並師李成陳立嘗畫龍眠山圖虞集跋其後劉耀丁野夫山

水學馬遠夏珪林士能張義上王起沈月田吳梅山李容瑾界畫俱師王孤雲

關漢卿解州人工樂府著北曲六十本世稱宋詞元曲然詞在唐

人已優為之惟曲自元始有南北十七宮調相傳當年取士有填

詞科主司定題目并限曲名及韻其賓白則伶人自為之一時文

人才士輩所撰雜劇計五百四十九種皆精審於字之陰陽韻之

平仄可以被管絃協律呂為太平勝事又曰昇平樂涵虛子曰元羣英

致遠漢宮秋等十三本如鵬搏九霄白仁甫梧桐雨等十七本如朝陽鳴鳳李壽卿臨岐柳等十

一本如春曉洞天喬孟符金錢記等八本如神鰲鼓浪費唐臣貶黃州等三本如三峽波濤宮大

用托公書等六本如西風鵬鴉王實甫西廂記等二十二本如花間美人張鳴善瑤琴怨等二本

如彩鳳刷羽鄭德輝細柳營等二十本如碧漢晴雲鄭庭玉送寒衣等十一本如九天珠玉庚吉

甫蘭昌宮等十六本如奇峯插天高文秀麗春園等三十五本如朱霞散綺王仲文五丈原等十

一本如劍氣騰空李文蔚魚鴈傳情等十本如閒雲出岫楊顯之瀟湘夜雨等十本如玉笛橫秋

趙文寶七德舞等六本如藍田美玉紀君祥松陰夢等八本如雪裏梅花吳昌齡辰勾月等十五

本如庭草交翠范子安竹葉舟等二本如空谷鳴泉武漢臣玉壺春等十二本如遠山疊翠子伯

淵珍珠旗等六本如新柳黃鸝李直夫虎頭牌等十三本如梅邊月影睢景臣千里投人等三本如鳳管秋聲金志甫西湖夢等八本如西山爽氣秦簡夫玉溪館等四本如峭壁孤松沈和甫瀟湘八景等六本如錦屏孔雀石君寶曲江池等十本如羅浮雪梅石子章竹牕雨等二本如清風夾簾戴善夫翫江樓等五本如老蛟泣珠尚仲賢柳毅傳等十本如山花獻笑王子一楚岫雲等四本如長鯨吸川谷子敬城南柳等三本如崑山片玉當時並稱傑構惜其人本無考按臧晉叔曰元以曲取士設十有二科其說甚為無據自至元八年設國學出策題試問所對精通者為中選皇慶二年制科舉第一場蒙古色目人試經問五條漢人南人經疑二問經義一首第二場蒙古色目人試策一道漢人南人古賦詔誥章表內科一道第三場漢人南人試策一道皆用經書時務為題並無詞曲一項此明證也

夏文彥字士良由吳興徙雲間好古嗜學尤篤愛繪事家藏翰墨最富當時賞鑒家隨其甲乙以定高下無毫髮爽乃自史皇封膜而下訖於有元刊冗補闕釐為五卷名圖繪寶鑑

麥宗麗江麼斐人生七歲不學而知文字及長徧通外番諸種書契下及禽鳥語或聞鉤輶格磔之聲能道其呼鳴之故試之輒驗滇中稱為異人子良從征大理有功授副元帥世鎮其土

用曰書列六藝畫奪神工由來學者不厭旁通填辭小道一

代宗風詎曰末技紀可無用

夫以宗廟之重而紀末技之末技可無用也

夫以宗廟之重而紀末技之末技可無用也

夫以宗廟之重而紀末技之末技可無用也

夫以宗廟之重而紀末技之末技可無用也

夫以宗廟之重而紀末技之末技可無用也

夫以宗廟之重而紀末技之末技可無用也

夫以宗廟之重而紀末技之末技可無用也

夫以宗廟之重而紀末技之末技可無用也

夫以宗廟之重而紀末技之末技可無用也

夫以宗廟之重而紀末技之末技可無用也